



宋槧太平御覽



1字3
403
26



43
403
26



太平御覽卷第一百四十八

皇親部十四

太子三



八幡
田中

新念圖書

此係明治
八年八月
廿八日
月八日
悼山田
郎君以
所購以
贈資

早稻田圖書

崔豹古今注曰漢明帝為太子樂人作歌詩四章以贊太子之德一曰日重光二曰月重輪三曰星重輝四曰海重潤
東觀漢記曰東海恭王疆光武皇帝長子也母郭后建武二年六月立為皇太子十七年十月郭后廢為中山太后自郭后廢疆不自安數因左右陳誠願備藩輔十九年六月疆廢為東海王二十八年十月就國食東海魯國并二郡二十九縣租入倍諸王賞賜恩寵無倫比致虎賁旄頭宮殿設鍾簾之懸疆性聰達恭謙臨之國比上書讓還東海十九縣又因皇太子固辭上不許以疆章示公卿大夫

深嘉歎之。續漢書曰：趙喜爲太尉，中元二年上崩，喜受遺詔典錄喪禮，新承王莽之亂，國無舊典，皇太子與諸王雜止同席，尊卑無別，喜乃正色橫劍殿階，扶下諸王，以明尊卑。范曄後漢書曰：孝順皇帝安帝之子，母李氏爲閹皇后，所害永寧元年立爲皇太子，延光三年安帝乳母王聖大長秋江京中常侍樊豐譖太子乳母王男廚監郗吉殺之，太子數爲歎息，王聖等懼有後禍，遂與豐京共陷太子，太子坐廢爲濟陰王。明年三月安帝崩，北鄉侯立濟陰王以廢黜，不能上殿，親臨梓宮，悲號不食，內外羣僚莫不哀之。及北鄉侯薨，車騎將軍閻顯及江京與中常侍劉安、陳達等白太后，秘不發喪，而更徵立諸國王子，乃閉宮門屯兵，自守。十一月丁亥，京師及郡國十六地震，是夜中黃門孫程

等十九人共斬江京、劉安、陳達等，迎濟陰王於德陽殿，西鍾下，即皇帝位。年十一。魏志曰：文帝爲五官將而臨淄侯植才名方盛，各有黨與，有奪宗之議。文帝使人問賈詡自固之術，詡曰：願將軍恢崇德度，躬素士之業，朝夕孜孜，不違子道。如此而已。文帝從之，深自砥礪。太祖又嘗屏除問詡，默然不對。太祖曰：與卿言而不答，何也？詡曰：屬有思，故不卽對耳。太祖曰：何思？詡曰：思表本初，劉景升父子也。太祖大笑。於是太子遂定。魏略曰：太祖不立太子，太子自疑。是時有高元昌者，善相，人乃呼問之，對曰：其貴乃不可言。因問壽幾，何元昌曰：其壽至四十，當有小恙，過是無憂，後無幾而立太子也。世語曰：辛毗女憲英，適太常羊耽，外孫夏侯湛爲其傳曰：憲英聰明有才鑒，初文帝與陳思王爭爲太子，旣而文帝

得立抱毗頸而告之曰辛君知我喜不毗以告憲憲歎曰太子代君主宗廟社稷也代君不可以不感主國不可以不懼宜感而喜何以能久魏其不昌乎

魏志曰明帝文帝太子也生而太祖愛之常令在左右魏書曰明帝生數歲而有岐嶷之姿武帝異之曰我基於爾三世矣每朝燕會同與侍中近臣並列帷幄好學多識特留意於法理

魏略曰文帝以郭后無子詔使子明帝帝以母不以道終意甚不平後不獲已乃敬事郭后且夕因長御問起居郭后亦自以無子遂加慈愛文帝始以帝不悅有意欲以他姬子京兆王爲嗣故不拜太子

魏末傳曰明帝嘗從文帝獵見子母鹿文帝射殺鹿母使帝射鹿子帝不從曰陛下殺其母臣不忍復射其子因涕

泣文帝即放弓箭以此深奇之而建樹之意定也

王隱晉書曰武皇帝寬惠仁厚深沉有智量風度容貌綽如也景元中爲撫軍咸熙元年晉國初開立爲世子遷撫軍大將軍開府副相國二年立爲太子

又曰惠帝爲太子時上素知太子闇弱後必亂國然不能擇才乃遣荀勗和嶠往觀之勗還盛稱太子德更進茂不同西宮之時也嶠答詔稱臣以爲太子如故不見更勝此自陛下家事非臣所盡知也於是天下貴嶠而賤勗也

又曰愍懷太子名遹音聿字熙祖少聰慧武帝愛之六七歲時帝夜望火太子牽上衣裾使入閣中上問其故太子對以暮夜倉卒宜備非常不當近火光令人照見也又嘗見官養豬肥大不常復問上何不殺以賜左右而久費五穀上即烹之由是益奇之常稱以爲似宣皇帝亦以東宮無

嫡有託後之意太康十年詔曰適既長且仁可令以適爲
廣陵王以廣陵臨淮爲封國邑五萬戶及世祖崩惠帝即
位立爲皇太子詔曰適尚幼蒙今出止東宮雖當賴師傅
群賢之訓其遊處左右宜得正人使共周旋能相長益者
太保衛瓘息庭司空司馬泰息略太子太傅楊濟息_音
太子少師裴楷息憲太子少傅張華息_音禕尙書令華廙_音
息_音恒並以道義之門有不肅之訓其令此六人更共往來
止其後太子好早居小馬小牛令左右騎斷羈勒使墮地
又令人屠肉已自分齊手揣輕重斤兩不差云其母本屠
家女也頗好遊宴或闕朝侍稍失儲副望賈后無子妬害
滋甚九年正月月暈赤黃數重三月十八日滎陽河南潁
川繁霜殺桑及桃李杏花尉氏雨血有聲若牛出許昌城
夏桑生于東宮西廂日長尺餘數日枯日中若飛鷲者積

數月漢中平中亦有此變皆爲太子也賈后作頡子髡太
子見頡之象也是時謠曰東宮馬子莫聾啞前至臘月纏
汝髮十一月天連日大風發屋折樹十二月二十八日后
遣宮婢齋書與太子云陛下昨夜不悵汝可入朝太子如
令請朝詔聽二十九日入朝賈后不見使婢陳舞賜棗酒
強使飲辭不見聽太子醉賈后誣奏太子有悖書廢徙金
墉城以干兵防送幽于許昌宮之別坊賈后與賈謐等早
害太子以絕民望三月十四日矯詔使小黃門孫慮害太
子賈后表以廣陵王禮殯趙王倫誅賈謐廢賈后帝乃使
侍節兼司空衛尉伊策故皇太子曰嗚呼少資岐嶷之質
荷先帝殊異之寵大啓土宇奄有淮陵朕奉導遺旨建爾
儲副以光顯我祖宗祗爾德行以從保傅事親孝敬禮無
違者而朕昧于凶構致爾于非命之禍俾申生孝已復見

于今賴宰相賢明人神憤怨以啓朕心討厥有罪咸伏其事何補於荼毒寃竟酷痛哉是用忉怛悼恨震動於五內今追復皇太子喪禮備制反葬京畿祠以太牢魂而有靈尚獲爾心

文士傳曰賈謐與愍懷太子博爭道成都王厲聲曰皇太子國之儲君賈長淵何得無禮

晉書曰明帝元皇帝長子也幼而聰哲爲元帝所寵異年數歲常坐置膝上屬長安使來因問帝曰汝謂日與長安孰遠對曰不聞人從日邊來居然可知也元帝異之明日宴群僚又問之對曰日近元帝失色曰何乃異聞者之言對曰舉目見日不見長安由是益奇之及帝即尊號立爲皇太子

已見明帝紀中

何法盛晉中興書曰肅宗中宗長子也建武元年中宗爲

昔王拜王太子及踐尊號爲皇太子冊曰於戲朕承天序忝繼祖宗之洪基君臨于萬邦戰戰兢兢若涉淵冰未有攸濟自古聖王敷宅四海莫不建立元子本枝百世今稽古授尔于儲官以陪貳于朕躬欽哉尔其克念乃祖日新厥德何遠非佞何親非賢欽翼師傅以丕崇大化可不慎歟爾其敬之

又曰孝宗穆皇帝諱聃康帝子也建元二年庚帝疾篤左光錄大夫領司徒謨尙書令恢等上疏曰臣聞皇義玄邈五帝攸往淳風澆散三王傳嗣欲令國有常居民有定奉關諸盛衰不易之道也伏惟皇子天挺奇表隆準豐下岐嶷之姿彰於始年大成之風顯於朞月宜建立儲宮允副民望請下太史擇吉日告宗廟備禮儀奉行奏可

後魏書曰太宗明元皇帝道武之長子初帝母旣賜死太

祖乃召帝告曰昔漢武帝將立其子而殺其母不令婦人後與國政使外家無亂汝當繼統吾故遠同漢武爲長久之計帝素純孝哀泣不能自勝太祖怒召之帝欲入左右曰孝子事父小杖則受大杖避之今陛下怒盛入或不測陷帝於不義不如且出待和解而進不晚也帝從之乃遊行於外及元紹之逆也帝還而誅之天賜六年即皇帝位又曰景穆皇帝太武皇帝之長子也母曰賀夫人延和元年立爲皇太子時年五歲明惠強識聞則不忘及長好讀經史皆通大義太武甚奇之初太武之伐河西李順等咸言姑臧無水草不可行太子有疑色及車駕至姑臧乃詔太子曰姑臧城東西門外涌泉於城北其大如河澤草茂盛可供大軍數年人之多言亦可惡也太子謂言者曰爲人臣不實若此豈是忠乎吾初聞有疑但帝決行耳幾誤

人大事言者復何面目見帝也正平元年六月薨於東宮時年二十四賜諡曰景穆皇太子高宗即位追尊爲景穆皇帝廟號恭宗

又曰世宗宣武皇帝孝文皇帝第二子也母曰高夫人初夢爲日所逐避於牀下日化爲龍繞已數匝遂有娠生帝於平城宮二十一年立爲皇太子

又曰肅宗孝明帝諱詡世宗第二子也延昌元年立爲皇太子二年世宗幸東宮召崔光與黃門甄琛廣陽王淵等並賜坐詔光曰卿是朕西臺大臣當令爲太子師傅光起拜固辭詔不許即命肅宗出從者十餘人勅以光爲傅之意令肅宗拜光光又拜辭不當受太子拜復不蒙許肅宗遂南面再拜詹事王顯啓請從太子拜於是宮臣畢拜光北面立不敢答拜唯西面拜謝而出

又曰廢太子生而母死文明太后撫視之常置左右詔曰昔塗山有育美名列於夏典任姒作配昌發顯於周書故能緝熙丕緒祚延八百自元子誕育於今四載而名表未孚於四方茂實未昭於朝掖非所以憲章遠猷允光禮度者也太皇太后親發明旨爲之立名依德協義名恂字元道國祚永隆儲貳有寄無窮之兆於是而始乃大赦天下太和十七年七月癸丑立恂爲皇太子高祖每歲征幸常留守恂不好書學體貌肥大深忌河洛暑熱意每追樂北方庶子高道悅數苦諫恂甚銜之乃刃道悅於禁中高祖引群臣於清徽堂議廢之爲庶人置之河陽後謀逆賜死梁書曰天監十四年正月朔旦帝臨軒冠太子於太極殿舊制太子着遠遊冠金蟬翠縷纓至是詔加金博山又曰昭明太子母丁貴嬪有疾太子還永福省侍疾衣不

解帶及薨步從喪還宮至殯水漿不入口每哭慟絕武帝命中書舍人顧協宣旨曰毀不滅性聖人之制不勝喪比於不孝有我在邠得自毀如此可即強進飲粥太子奉勅乃進數合自是至葬日進麥粥一升武帝又勅曰聞汝所進過少轉羸瘦我比更無病正爲汝如此胷中亦圯塞成疾應強加饘粥不使我恒爾懸心雖屢奉勸逼終喪日止一溢不嘗菜菓之味體素壯腰帶十圍至是減削過半每入朝士庶見者莫不下泣又曰昭明太子性愛山水於玄圃穿築更立亭館與朝士名素高者遊其中嘗泛舟後池番禺侯軌盛稱此中宜奏女樂太子不荅詠左思招隱詩云何必絲與竹山水有清音軌慙而止又曰昭明太子好士愛文劉孝綽與陳郡殷芸吳郡陸倕

琅琊王筠彭城劉洽等同見禮待太子起樂賢堂
後周書曰宣帝諱贊高祖長子帝即位多過惡初帝之在
東宮也高祖慮其不堪承嗣遇之甚嚴朝見進止與諸臣
無異雖隆寒盛暑亦不得休息性既嗜酒高祖遂禁醪醴
不許至東宮帝每有過輒加捶扑嘗謂之曰古來太子被
廢者幾人餘兒豈不堪立邪於是遣東宮官屬錄帝言語
動作每月奏聞帝憚高祖嚴矯情脩飾以是過惡遂不聞
隋書曰煬帝高祖第二子也母文獻獨孤皇后上美姿儀
少敏惠高祖及后於諸子中特鍾愛高祖幸上所居第見
樂器絃多斷絕又有塵埃若不用者以爲不好聲伎之玩
上尤自矯飾當時稱爲仁孝及太子勇廢立爲皇太子
唐書曰李綱隋開皇末爲太子洗馬皇太子勇嘗以歲首
宴宮臣左庶子唐令則自請奏琵琶又歌武媚娘之曲綱

趨而出勇曰我欲爲樂耳君勿多事及勇廢黜文帝召東
宮官屬切讓之无敢對者綱對曰今日之事乃陛下之過
非太子之罪也太子才非上品性是常人若得賢明之士
輔導之足堪繼嗣皇業方今多士盈朝當擇賢居任奈何
以絃歌鷹犬之才日在其側致令至此乃陛下訓導不足
豈太子之罪耶

隋書曰元德太子昭煬帝長子也生而高祖命養宮中三
歲時於玄武門弄石師子高祖與文獻后至其所高祖適
患腰痛舉手憑后昭因避去如此者再三高祖歎曰天生
長者誰復教乎由是大奇之高祖嘗謂曰當爲爾娶婦昭
應聲而泣高祖問其故對曰漢王未婚時恒在至尊所一
朝娶婦則便出外懼將遠離是以啼耳上歎其有至性特
鍾愛焉煬帝即位便幸雒陽宮昭留守京師大業元年帝

遣使者立爲皇太子

唐書曰太宗文皇帝高祖第二子也母曰大穆皇后以隋開皇十八年生於武功之別館初在孕而語聲聞於外后心異之將誕育后不之覺而太宗已生高祖受禪拜尙書令進封秦王武德九年立爲皇太子

又曰隱太子建成高祖長子也大業末高祖捕賊汾晉令建成攜家屬寄于河東義旗建遣使密召之建成與巢王元吉問行赴太原建成至高祖大喜拜左領軍大都督封隴西郡公引兵略西河郡從平長安義寧元年冬隋恭帝拜唐國世子開府置僚屬二年授撫軍大將軍東討元帥將兵十萬徇洛陽及還恭帝授尙書令武德元年立爲皇太子時太宗功業日盛建成與齊王元吉潛謀作亂九年六月三日太宗密奏建成元吉淫亂後宮因自陳曰臣於

兄弟无絲毫所負今欲殺臣似爲世充建德報讎臣今枉死永違君親魂歸地下實亦恥見諸賊高祖省之愕然報曰明日當勘問汝宜早參四日太宗將左右九人至玄武門自衛高祖已召裴寂蕭瑀竇誕陳叔達封倫宇文士及顏師古等欲令窮覈其事建成元吉行至臨湖殿覺變即迴馬將東歸官府太宗隨而呼之元吉馬上張弓再三不穀太宗乃射之建成應弦而斃

又曰高宗文皇帝太宗第九子母曰文德順聖長孫皇后貞觀二年生於東宮之麗正殿封晉王幼而岐嶷端審寬仁孝友初授孝經太宗問曰此書中何言爲善對曰夫孝始於事親中於事君終於立身太宗大悅日行此足以事父兄爲臣子矣太子承乾廢長孫無忌李勣等議立爲皇太子

又曰太子承乾得罪太宗欲立晉王而限以非次惶惑不
 決乃御兩儀殿羣臣盡出獨留長孫無忌及司空房玄齡
 李勣謂曰我三子一弟所為如此我心無聊因自投於序
 抽佩刀欲自刺無忌等驚懼爭前扶抱取佩刀以授晉王
 無忌等請太宗所欲報曰我欲立晉王無忌曰謹奉詔有
 異議者臣請斬之太宗謂晉王曰汝舅許汝也汝宜拜謝
 晉王因下拜太宗謂無忌等曰公等既符我意未知物論
 何如無忌曰晉王仁孝天下屬心久矣乞召問百僚必無
 異辭於是建立遂定

太平御覽卷第一百四十八

太平御覽卷第一百四十九

皇親部十五

太子四

太弟

大孫

太子妃

良娣

家人子附

唐書曰廢太子瑛音英玄宗第二子也景雲元年封真定郡
 王開元三年立為皇太子母趙麗妃本伎人有才貌善歌
 舞玄宗在潞州得幸及武惠妃寵幸麗妃恩乃漸弛惠妃
 女咸宜公主出降於楊洸洸希惠妃之旨規利於己日求
 其短譖於惠妃惠妃泣訴於玄宗以太子結黨將害於妾
 母子亦指斥於至尊玄宗惑其言震怒謀於宰相意將廢
 黜中書令張九齡奏曰陛下纂嗣鴻業將三十年太子已
 下常不離深宮日受聖訓今天下之人皆慶陛下享國日
 久子孫蕃育不聞有過陛下奈何以一日之間廢棄三子
 且太子國本難於動搖昔晉獻公惑寵嬖之言太子申生

憂死國乃大亂漢武威加六合受江充巫蠱之事禍及太子遂至城中流血晉惠帝有賢子爲太子容賈后之譖以至喪亡隋文帝取寵婦之言廢太子勇而立晉王廣遂失天下由此而論之不可不慎今太子旣長無過二王又賢臣侍罪左右敢不詳悉立宗默然事且寢二十五年四月楊涸又搆於惠妃言璵兄弟三人與太子妃兄駙馬薛鏞常構異謀立宗遽召宰相籌之李林甫曰此蓋陛下家事臣下不合參知立宗意乃決矣使中官宣詔於宮中並廢爲庶人天下之人不見其過咸惜之寶應元年詔贈皇太子

又曰靖恭太子琬立宗第六子也天寶十四年安祿山反於范陽其月制以琬爲征討元帥高仙芝爲副令仙芝徵河隴兵募屯於陝郡以禦之數日琬薨素有雅稱風格秀

整時士庶冀琬有所成功忽然殂謝遠近咸失望焉贈靖恭太子葬於見子西原
又承天皇帝倓音談旣爲張良娣所構肅宗怒而幽死又欲搖動代宗時代宗收復兩京遣判官李泌音泌入朝獻捷從容語及倓事泌曰臣幼穉時念得黃臺菘辭陛下聞其說乎高宗大帝有子八人天后所生四子自爲行弟故睿宗第四長曰孝敬皇帝弘爲太子監國仁明孝悌天后方圖臨朝乃鳩殺之立雍王賢每自憂惕知必不保全與二弟同侍父母之側无由敢言乃作黃臺菘辭令樂工歌之翼天后聞之哀愍辭曰種菘黃臺下菘熟子離離一摘使菘好再摘令菘稀三摘尚自可四摘抱蔓歸太子賢終爲天后所逐死於黔中陛下有今日運祚已一摘矣慎无再摘上愕然曰卿安得有是言自是奪宗之計不行

又曰憲宗章武皇帝順宗長子母王太后六七歲時德宗抱置膝上問曰汝誰子在吾懷對曰是第三箇天子德宗異而怜之貞元四年封廣陵王順宗即位之年封冊爲皇太子

又曰懿宗恭惠皇帝宣宗長子母日元昭皇太后晁氏大和七年生於藩邸封鄆王大中十三年宣遺詔立爲皇太子姿貌瑰傑有異稠人藩邸時當重疾郭妃侍醫藥見黃龍出入於卧內妃以告帝曰慎勿言

又曰僖宗恭定皇帝懿宗第五子母曰惠安皇后王氏初封普王懿宗大漸制曰朕守六器之重居兆人之上日慎一日如履如臨旰吳勞懷寢興思治涉道猶淺道化未孚而攝養乖方寒暑成厲實有慮於闕政且無暇而怡神考茲舊章謀于卿士思闡鴻業式建皇儲第五男普王孝敬

溫恭寬和博厚日新令德天假英姿言皆中規動必由禮俾崇邦本允叶人心宜立爲皇太子權勾當軍國政事咨爾中外卿士暨于腹心之臣各竭乃心永安黎獻

附 太弟

王隱晉書曰惠帝永寧二年立清河王覃爲太子成都河間王復廢覃爲清河王立成都王穎爲皇太弟

晉陽秋曰永興元年河間王頤表拜成都王穎爲皇太弟司空越高密王簡平昌公摸等以太駕北征廢皇太弟穎立預章王熾爲皇太弟

崔鴻十六國春秋曰晉成都王穎爲皇太弟領丞相自鄴懸秉朝政事無大小皆先關諮

唐書曰武宗肅皇帝穆宗第五子母曰宣懿皇后韋氏長慶元年封穎王開成五年文宗疾兩軍中尉仇士良魚志

弘矯詔迎穎王於十六宅曰朕自嬰疾疹有加無瘳懼不能躬搃萬機日釐庶政稽于古訓謀及大臣用建親賢以貳神器親弟穎王灑音昔在藩邸與朕嘗同師訓動成儀矩性稟寬仁俾奉昌圖必諧人欲可立爲皇太弟應軍國政事便令勾當百辟卿士宜竭迺心

又曰昭宗景文皇帝懿宗第七子母曰惠安太后王氏帝於僖宗母弟也尤相親睦自艱難播越嘗隨侍左右僖宗不豫遺詔立爲皇太弟

太孫附

王隱晉書曰趙王倫既廢賈后皇帝使使持節追復皇太子拜皇孫藏爲臨淮王尙爲襄陽王又詔立臧爲皇太孫文武官屬卽轉爲太孫官屬車服侍從皆愍懷之舊也趙王倫篡位太孫廢爲濮陽王薨惠帝復祚立襄陽王尙爲

皇太孫薨謚冲皇太孫并追謚前太孫爲哀皇太孫

晉惠帝起居注曰拜皇孫臧爲臨淮王尙爲襄陽王又詔臧爲皇太孫臧廢到銅駝街宮人侍從皆哽咽路人收淚焉乘復生於西廂長丈餘太孫廢乃枯元平又曰惠帝詔以太常成祭爲太孫太傅前城間校尉梁柳爲太孫少傅

又曰惠帝使使持節兼司空任城王齊策命愍懷皇太子前妃爲皇太孫太妃是日也以復妃告于太廟

後魏書曰高宗文成皇帝景穆帝之長子也母曰閭氏帝少聰達太武常置左右號世嫡皇孫宗又曰劉尼代人也父祖皆爲方面大人少壯健有膂力世祖善之拜羽林中郎宗愛既殺南安王余於東廟秘之惟尼知之尼勸愛立高宗愛自以負罪於景穆聞而驚曰君

大癡人皇孫若立豈忘正平時事乎尼以狀告殿中尚書源賀仍謀於南部尚書陸麗麗曰唯有密奉皇孫耳於是賀與長孫渴侯嚴兵守衛尼與麗迎高宗於苑中麗抱高祖馬上入於京城尼馳還東廟大呼曰宗愛殺南安王大逆不道皇孫已登大位有詔宿衛之士皆可還宮眾咸唱萬歲

後周書曰建德二年夏六月壬子皇孫衍生文武官普加一階

蕭子顯齊書曰文惠太子長懋音戊字雲喬世祖長子也世祖年未弱冠而生太子為太祖所愛建元元年封南郡王邑二千戶江左未有嫡皇孫封王始自此也又曰鬱林王昭業字元尚文惠太子長子也小名法身文惠太子薨立昭業為皇太孫居東宮昭業少美容止好隸

書世祖勅皇孫手書不得妄出以貴重之

唐書貞觀十七年誕皇太孫宴宮寮於弘教門太宗幸東宮自殿北門入謂宮臣曰頃來生業稍可非乏酒食而唐突公等宴會朕有甲觀之慶故就卿為樂耳謂太子曰爾國之儲貳府藏是同金玉綺羅不足為賜但先聖典籍可為鏡誠耳因賜尚書毛詩孝經各一部

又曰永淳元年立皇孫重照為皇太孫將置府寮上召吏部侍郎裴勗彝郎中王方慶問曰今立太孫前代故事如何方慶進曰臣按周禮有嫡孫漢魏已來皇太子在亦不立太孫但封王耳今陛下肇建皇孫創斯盛典所以彰子孫千億之盛福祚靈長之應也上悅

附錄太子妃

白虎通云妃者匹也妃匹者何謂也相與偶焉古者天子

後宮嫡庶皆曰妃史記曰黃帝有四妃帝周以天子之正嫡為王后秦稱皇帝因稱皇后以太子之正嫡稱妃漢因之漢書外戚傳云太子妃有良娣有孺子妾妻凡三等是也魏晉以後咸遵之

漢書曰孝景薄皇后孝文薄太后家女也景帝為太子時薄太后取以為太子妃帝即位立為皇后初武帝得立為太子長主有力取主女為妃及帝即位立為皇后

又曰元帝為太子司馬良娣死後太子悲患發病忽忽不樂宣帝令皇后擇後宮家人子可以娛侍太子者王禁女政君預焉時預擇者五人政君獨衣絳緣諸子諸于大使侍中杜輔送入太子宮見於丙殿得御幸有身立為太子妃

又曰孝成許皇后平恩侯嘉女也元帝選配皇太子初入太子家上令中常侍黃門親近者侍送還白太子欣說狀元帝喜謂左右酌酒賀我左右皆稱萬歲及成帝即位立許妃為皇后

又曰孝哀帝傳皇后定陶傅太后從弟子也哀帝為定陶王時傅太后欲重親取以配王王入為太子傅氏女為妃哀帝即位立為皇后

後漢書曰明德馬皇后伏波將軍援小女也初援征五溪蠻卒於師虎賁中郎將梁松黃門侍郎竇固等因譖之由是家益失勢又數為權貴所侵侮后從兄嚴不勝憂憤白太夫人絕竇氏婚求進女掖庭乃上書曰臣叔父援辜恩不報而妻子特獲恩全戴仰陛下為天為父竊聞太子諸王妃匹未備援有三女大者十五次者十四小者十三儀

狀髮膚上中以上皆孝順小心婉順有禮願下相工簡其
可否如有萬一援不朽於黃泉由是選后入太子宫時年
十三

吳志曰太子孫和賜死和與妃張辭別張曰吉凶當相隨
終不獨生活也亦自殺

蜀志曰後主敬哀皇后車騎將軍張飛女也章武元年納
為太子妃建興二年立為皇后

王隱晉書曰楊元后武帝娶之生惠帝謀婚人不決上欲
娶衛瓘女后欲娶賈充女充妻郭酷妬宿著土曰衛公女
有五可賈公女有五不可衛家種賢而多子端正而長白
賈家種妬少子酷而短黑郭必欲使所生女配太子既先
使人言又輸寶物於楊后固啓必成本當娶后妹午年年
十二小太子一歲因見短小未勝衣更娶南風南風時年

十五大太子二歲上乃聽之帝知太子不惠又聞衛瓘言
故試之盡召東宮大小宮屬為作飲食而密封詔事使太
子決停信待之賈妃大懼倩外人作荅詔草給使張泓行
還啓賈妃曰太子不學而荅詔引義必致責作草主更益
謹負不如直以意荅賈妃大喜語泓便為我好荅得富貴
與汝共之泓素有才荅之過高武帝大喜於是賈妃諷旨
於外說張泓孝廉郎才語領軍舉高弟充遣詔妃曰衛瓘
老奴幾破汝家事於是賈妃銜之

又曰賈妃酷妬手斫數人或以載擿音孕妾子乃隨刃墮
地上聞大怒垂廢之苟勗深救之故得不廢

晉氏后妃別傳曰武悼皇后武帝繼室也太傅楊駿女賈
庶人為太子妃時數以肆戾情性忌妬失帝意帝欲廢焉
后為妃陳請曰魯公有勳於王府妃親則其子妬忌婦人

之常事不足以一貴而忘大德帝納焉
王隱晉書曰初世祖遣才人謝玖給事惠帝因是有娠臨
嫩賈妃迎玖西宮遂生愍懷太子惠帝卽位立爲皇太子
爲娉王夷甫小女惠風賈后暴戾日甚乃表乞免爲庶人
送太子妃王氏入金墉城妃父尚書令王衍見脅表離婚
妃出金墉城號哭感動左右道路爲之悲愴也
又曰劉曜王弥等入洛盡將諸后妃去愍懷太子王妃拔
刀向賊曰我司徒公女皇太子妃死則已終不爲賊婦賊
乃害之
晉起居注曰元帝大興五年上臨軒使策命拜晉王太子
妃庾氏爲皇太子妃
晉孝武帝起居注曰納采聘太子妃百官朱服會於新安
公主弟秘書監王操之爲主人

晉孝武帝起居注曰上臨軒設懸而不樂遣兼司空望蔡
公謝琰納太子妃王氏詔曰太子諱婚禮卽就仰祖宗遺
烈憑道德之資保傅將翼賢士竭誠慎行修德積善慶隆
豈唯在予天賚賜所以宣其悅情其便依舊有賜左僕射
王珣奏賜文武綉布百官詣止車門上禮
甲辰儀曰皇太子妃公妃夫人逢持節使者高車使者皆
住車相揖妃主皆住車不揖
東宮舊事曰司徒會稽王道子等啓曰皇太子係體宸極
年德並茂宜簡國媛緝宣內教故中書令太常王獻之新
安公主息女六行聿修四德允備加世載簡正慶深積善
僉曰宜作配儲宮正位中饋太元二十一年皇太子納妃
琅邪臨沂王氏時年十四
王隱晉書曰安僖皇后王氏字神受太常王獻之女新安

公主生即安帝姑也孝武帝以后少孤無兄弟故為安帝
 納為太子妃
 東宮舊事曰有詔以皇太子納妃賜帛各有差使持節兼
 司空公尚書右僕射謝琰副護軍將軍臨湘縣侯車胤迎
 詹事尚書左僕射王珣率東宮屬迎于主第
 東宮舊事曰皇太子納妃給織成袞帶白玉佩四望車羽
 葆前後部鼓吹各一部步搖一具九鈿函盛之同心雀鈿
 一具函盛鬢花六五支登花二五支團樹花十株碧紗座
 旌半繡一丹羅杯文長命綺褱褱音屬
 又曰太子納妃絳真文羅一幅被子一絳羅繡四幅被一
 又曰皇太子納妃有絳真文羅袴漆龍頭支髻枕一銀花
 鍅鈕自副金塗連盤鴨燈一絳地文履一量漆花簾一絳
 地織成綺綬有七綵杯文綺一絳石杯文綺被有一又七

綵杯文綺袴長命杯文綺袴

晉令曰皇太子妃珮瑜玉

沈約宋書曰皇太子妃金璽龜鈕纁朱綬佩瑜玉

又曰少帝司馬皇后諱苳英河內温人晉恭帝女也初封

海鹽公主少帝以公子尚焉宋初拜皇太子妃少帝即位

為皇后

又曰前廢帝何皇后諱令媿廬江潯人也孝建三年納為

皇太子妃

又曰後廢帝江皇后諱簡珪濟陽考城人北中郎長史智

淵孫女太始五年太宗訪太子妃而雅信小數名家女多

不合江氏雖世為華族而后父祖並已亡弟又弱小門無

強蔭以卜筮最吉拜為皇太子妃

蕭子顯齊書曰皇太子妃厭翟車如重翟車漆畫輪車太

子妃亦乘之

又曰文安王皇后諱寶明琅邪臨沂人建元元年為南郡王妃四年為皇太子妃無寵太子為宮人制新麗衣裳及首飾而后牀帳陳古舊釵鈿奴叶切十餘枚

唐書曰太宗文德皇后長孫氏少好讀書造次必循禮則十三嬪于太宗武德九年冊拜皇太子妃

又曰高宗廢后王氏同安長公主即后之從祖母也公主以后有美色遂納為晉王妃高宗登儲冊為皇太子妃

又曰開元中勅所選皇太子及諸王等妃既足百官子女禮合避人今遣就本縣及過本司未為得所其應預妃者宜令所司具名錄奏各令女及近親隨使於命婦朝堂待進止

良娣附

漢書曰衛太子史良娣宣帝祖母也太子有妻妾凡三等子皆稱皇孫史良娣家本魯國母貞君兄恭元鼎四年入為良娣生男進號史皇孫武帝末巫蠱事起衛太子及良娣史皇孫皆遭害

沈約宋書曰大明五年七更為太子置內職二等曰保林曰良娣納南中郎長史太山羊贍女為良娣

蕭子顯齊書曰建元三年太子宮置三內職良娣比開國侯太子

唐書曰蕭宗張皇后天寶中選入太子宮為良娣

唐書曰順宗莊憲皇后王氏幼以良家子入宮為才人順宗在藩邸時代宗以才人賜之生憲宗皇帝立為孺人順宗升儲冊為良娣

附 孺子附

後魏史曰劉芳沉雅方正太子恂之在東宮高祖欲為納
 芳女芳辭以年貌非宜更勅芳舉其宗女芳乃稱其族子
 長文之女高祖乃為恂媾之與鄭懿女對為左右孺子焉
 王隱晉書曰愍懷太子廢為庶人考竟太子母淑妃謝玖
 及太子所辜保林蔣俊及母三弟
 沉約宋書曰大明五年上為太子納宜都守表僧惠女為
 保林
 蕭子顯齊書曰太子保林比五等侯
 王隱晉書曰世祖遣才人謝玖給事惠帝因是有娠臨娶
 賈妃逆玖西宮遂生愍懷
 蕭子顯齊書曰太子才人比駙馬都尉

家人子 附

漢書曰史皇孫王夫人宣帝母也名翁須皇孫妻妾無號
 位皆稱家人子生宣帝數月衛太子史皇孫敗家人子皆
 坐誅

太平御覽卷第一百四十九

太平御覽卷一百四十九
 漢書百官表曰諸侯王高帝初置金璽組綬
 史記曰高帝得定陶戚姬愛幸生趙王如意幾代太子者
 數矣賴大臣爭之及留侯策太子得無廢高帝崩惠帝立
 呂后使人持鴆飲之遂斷戚夫人手足去眼燻耳飲瘖藥
 使居廁中名曰人彘居數日迺召惠帝視人彘帝視而知
 其戚夫人迺大哭因病歲餘不能起使人請太后曰此非
 人所為臣為太后子終不能治天下
 又曰燕王劉澤漢書曰澤高帝從祖昆弟高帝十一年封為營陵侯高
 后時齊人田生以畫干營陵侯澤澤大悅之用二百斤金
 為壽田生已得金假大宅令其子求事呂太后所幸大謁

太平御覽卷第一百五十

皇親部第十六

諸王上

漢書百官表曰諸侯王高帝初置金璽組綬
 史記曰高帝得定陶戚姬愛幸生趙王如意幾代太子者
 數矣賴大臣爭之及留侯策太子得無廢高帝崩惠帝立
 呂后使人持鴆飲之遂斷戚夫人手足去眼燻耳飲瘖藥
 使居廁中名曰人彘居數日迺召惠帝視人彘帝視而知
 其戚夫人迺大哭因病歲餘不能起使人請太后曰此非
 人所為臣為太后子終不能治天下
 又曰燕王劉澤漢書曰澤高帝從祖昆弟高帝十一年封為營陵侯高
 后時齊人田生以畫干營陵侯澤澤大悅之用二百斤金
 為壽田生已得金假大宅令其子求事呂太后所幸大謁

者張卿居數月請張卿酒酣乃屏人說張卿曰太后欲立
呂產爲王恐大臣不聽今卿最幸大臣所敬何不諷大臣
以聞太后太后必喜諸呂已王萬戶侯亦卿有卿大然之
乃諷大臣立呂產爲王田生因說張卿曰呂產王也諸大
臣未服今營陵侯澤諸劉爲大將軍尙缺音缺望今卿言太
后十縣王之彼得王喜去諸呂益固矣張卿入言太后乃
以澤爲琅瑯王

又曰齊哀王襄悼惠王子高祖孫也太尉周勃誅諸呂大
臣欲立齊王瑯琊王澤曰齊王母家駟鈞惡戾虎而冠者
張晏曰言鈞惡戾如虎而着冠也方以呂氏幾亂天下又立齊王是復爲
呂氏也

漢書曰吳王濞高帝兄仲之子也高祖立濞於沛爲吳王
已拜受印高祖召濞相之曰若狀有反相因撫其背曰後

五十年東南有亂豈若耶天下同姓一家汝慎無反濞頓
首曰不敢

又曰楚元王交高帝少弟也高祖卽帝位交與盧縮常侍
上出入卧内傳語言諸内事隱謀文帝尊寵元王子爵比
皇子

又曰齊悼惠王肥其母高祖微時外婦也高祖六年立食
七十餘城孝惠二年入朝帝與齊王燕飲太后前置齊王
上坐如家人禮太后怒遣人酌卮鳩酒置前令齊王爲壽
齊王起帝亦起欲俱爲壽太后恐自起反卮齊王怪之因
不敢飲陽醉而去

又曰濟北王興居初以東牟侯與大臣共立文帝於代邸
曰誅呂氏臣無功請與太僕滕公入清宮遂將少帝出迎
皇帝入宮始誅呂氏時朱虛侯功尤大大臣許盡以趙地

王朱虛侯章盡以梁地王東牟侯興居及孝文帝立聞朱

虛東牟之初欲立齊王故黜其功

又曰淮南王安為人好書鼓琴不喜弋獵狗馬騁馳亦欲

行陰德撫循百姓流譽招致賓客方術之士數千人作為

內書二十篇外書甚衆有中篇八卷言神仙黃白之術

張晏曰黃白金亦二十萬言時武帝方好藝文以安屬為諸父

白銀辯博善為文辭甚重尊之每為報書及賜

張晏曰賜賜書常召司馬相如等視草乃遣初安入朝獻所作內篇新出上愛秘

之使為離騷賦且受詔食時上

又曰孝文皇后生景帝梁孝王孝王太后少子愛之賞賜

不可勝道於是孝王築東苑方三百餘里廣睢陽城七十

里大治宮室為複道自宮連屬於平臺三十餘里

如淳曰北離宮在梁東得賜天子旌旗從千乘萬騎出稱蹕入言警擬天

子招延四方豪傑自山東遊士莫不至

又曰梁懷王緝文帝子也文帝愛之異於他子五年一朝

因墮馬死

又曰孝景栗姬生河間獻王德孝景二年立脩學好古從

民間得善書必為好寫與之留其本加金帛賜以招之繇

是四方道術之人不遠千里或有先祖舊書多奉以奏獻

王者故得書多與漢朝等脩禮樂被服儒術造次必於儒

者武帝時獻王來朝獻雅樂及詔策問三十餘事其對推

道術而言得事之中文約而指明

又曰江都易王非景帝子吳楚反時非年十五有材氣上

書願擊吳景帝賜非將軍印吳已破二歲為江都王治吳

故國以軍功賜天子旌旗元光五年匈奴大入漢為賊非

上書願擊匈奴上不許

又曰孝景程姬生魯恭王餘二年立為淮陽王吳楚反破後徙王魯好治宮室苑囿狗馬好音樂口吃難言王初治室壞孔子舊宅以廣宮室聞鍾磬琴瑟之聲遂不敢復壞於其壁中得古文經傳

又曰孝景賈夫人生中山靖王勝建元三年來朝天子置酒勝聞樂聲而泣帝問其故勝對曰臣聞悲者不可為累歆思者不可為歎息故高漸離擊筑易水上荆軻為之低而不食雍門子壹微吟孟嘗君為之於邑今臣之心結日久每聞窈眇之聲不知涕泣之橫集也夫衆煦漂山應劭曰煦吹聚蚊成雷朋黨執虎十夫撓椎臣身遠與寡莫為之先衆口鑠金積毀銷骨聚輕折軸羽翮飛肉今臣雍闕不得聞竊自悲也臣聞社稷不灌屋鼠不燠何則所託者然也臣雖薄也得蒙肺腑位雖卑也得為東藩屬又稱兄今羣

臣非有葭苧之親張晏曰葭蘆葉苧裏白皮也鴻毛之重羣居黨議朋

友相為使夫宗室擯却骨肉冰釋斯伯奇所以流離比干所以橫分也勝又樂酒好內有子百二十餘人常與趙王彭祖相非曰卿為王專代吏治事王者當日聽音樂御聲色趙王亦曰中山王但奢淫不佐天子拊循百姓何以稱為藩臣

又曰景帝唐姬生長沙定王發唐姬故程姬侍者景帝召程姬有所避不願進而飭侍者唐兒使夜進上醉不知幸之遂有身及生子因名曰發以母微無寵故王居卑濕貧國應劭曰景帝後二年諸王來朝有詔稱爵歌詩定王但張袖小舉手左右嗟其拙上恠而問之對曰臣國小地狹不足回旋帝以武陵桂陽屬焉

又曰孝武李姬生燕刺盧達切王且為人辯略博學經書及衛太子敗齊懷王又薨且自以次第當立上書求入宿衛

上怒下其使獄遂立少子為太子帝崩太子立是為孝昭
 帝賜諸侯王璽書且得書不肯哭霍光秉政褒賜燕王錢
 三萬益封萬三千戶因怒曰我當為帝何賜也多齎金寶
 走馬賂遺蓋古盍切主上官桀及御史大夫桑弘羊弘羊等
 皆與交通數記疏光過失與且令上書告之桀欲從中下
 其章且聞之喜上疏是時昭帝年十四覺其有詐桀等皆
 伏誅且聞之憂懣音悶置酒萬載宮會賓客臣妾坐飲王自
 歌曰歸空城兮狗不吠雞不鳴橫術何廣廣兮蘇林曰廣
音曠以
術為道路固知國中之無人華容夫人起舞曰髮紛紛兮置渠
 骨籍籍兮亡居母求死子兮妻求死夫徘徊兩渠間兮君
 子獨安居坐者皆泣
 又曰孝武李姬生廣陵厲王胥倡樂逸遊故終不得為漢
 嗣始昭帝時胥見上年少無子有覬欲心迎女巫李女須

使下神祝詛女須泣曰孝武帝下我左右皆伏言吾必令
 胥為天子胥多賜女須以錢會昭帝崩胥曰女須良巫也
 殺牛賽禱及昌邑王徵復使巫祝詛之後王廢胥深信女
 須等宣帝即位胥曰太子孫何以反得立復令女須祝詛
 如前又胥女為楚王延壽后弟婦相餽音饋遺通私書後延
 壽謀反誅辭連及胥又聞漢立太子謂姬南等曰我終不
 得立矣居數月祝詛事發覺有司按驗天子遣廷尉大鴻
 臚即訊胥胥既見使者還置酒顯陽殿召太子霸及子女
 董訾胡生等夜飲使所幸八子郭昭君家人子趙左君等
 鼓瑟歌舞王自歌曰欲久生兮無終長不樂兮安窮奉天
 期兮不得須臾千里馬兮駐待路黃泉下兮幽深人生要
 死何為苦心何用為樂心所喜出入無惊為樂亟蒿里召
 兮郭門閱死不得取代庸身自逝左右悉更涕泣奏酒至

雞鳴時罷胥謂太子霸曰上遇我厚今負之甚我死骸骨當暴幸而得葬薄之無厚也卽以綬自絞死
又曰淮陽憲王欽宣帝子好經書法律聰達有才帝甚愛之數嗟歎憲王曰真我子也
又曰初楚元王敬禮申公等穆生不嗜酒元王每置酒常爲穆生設醴也
又曰王尊爲東平相東平王以至親驕奢不奉法度傅相連坐及尊視事奉璽書至庭中王未及出受詔尊持璽書歸舍食己乃還致詔後謁見王大傅在前說相鼠之詩尊曰毋持布鼓過雷門王怒起入後宮復延請登堂尊謂王曰尊來爲相人皆弔尊也以尊不容朝廷故見使相王耳天下皆言王勇王顧但負貴安能勇如尊乃勇耳王變色視尊意欲格殺之卽好謂尊曰願觀相君佩刀尊舉掖顧

謂傍侍郎前引佩刀視王王欲誣相拔刀嚮王耶王又雅聞尊高名大爲尊屈酌酒具食相對極歡
東觀漢記曰東平獻王蒼少有孝友之質寬仁弘雅明帝卽位詔以爲驃騎將軍位在三公上四年蒼上疏願朝上以王觸寒涉道使中謁者賜乘輿豹裘蒼到洛陽使鴻臚持節郊迎引入不在讚拜之位升殿乃拜上親答拜諸王歸國上特留蒼八月欽耐畢大鴻臚奏遣蒼蒼發上親臨送流涕賞賜以億萬數
又曰明帝詔書示諸國曰詔問東平王蒼處家何等最樂王對曰爲善最樂帝曰其言甚大稱是腰腹蒼美鬚髯腰帶圍八尺二寸
又曰北海靖王興每朝廷有異政京師雨澤秋稼好醜輒乘驛馬問焉其見親重如此

又曰廣陵思王荆性刻急隱害喜文法有才能中元二年
世祖崩不悲哀而作飛書與東海王強說之令舉兵爲逆
亂強得荆書卽執其行書者封上之以親親隱其事遣荆
止河南宮

又曰明德后詔書流布咸稱至德王主諸家莫敢犯禁廣
平鉅鹿樂成王在邸入問起居帝望見車騎鞍勒皆純墨
無金銀綵飾馬不踰六尺於是以白太后卽賜錢各五百
萬於是施親戚被服自如

范曄後漢書曰沛獻王輔矜嚴有法度好經書善說京氏
易孝經世號之曰沛王通論在國謹節終始如一稱爲賢
王顯宗敬重數賞賜焉

又曰琅琊孝王京建武十七年追爵爲王京性恭孝好經
學顯宗尤愛幸賞賜恩寵殊異莫與爲比光烈皇后崩帝

悉以太后遺金財寶賜京京都昔好治宮室窮極伎巧皆
飭以金銀上詩賦頌德帝嘉美下之史官

又曰樂成靖王黨永平十五年封樂成王黨聰慧善史書
好正文字與肅宗同年尤相親愛

又曰清河王慶爲太子竇后諷有司奏廢慶慶時雖幼而
知避嫌畏禍言不敢及宋氏帝更憐之勅皇后令衣服與
太子齊等慶小心恭孝自以廢黜尤畏事慎法每朝謁陵
廟常夜分嚴裝衣冠待明約勅官屬不得與諸王車馳常
以貴人葬禮有闕每竊感恨至四節獵輒祭於私寢竇氏
誅後始使乳母於城北遙祠及竇太后崩慶求上冢致哀
帝許之詔大官四時給祭慶垂涕日生雖不獲供養終得
奉祭祀私願足矣

又曰李燮字德公靈帝時拜安平相先是時安平王續爲

張角賊所略國家贖王還欲復其國燮奏曰續在國無守
蕃政不稱損辱聖朝不宜復國續竟歸蕃燮以謗毀宗室
輸作佐校未滿歲王果坐不道被誅乃拜燮爲議郎
又曰董卓置弘農王於閣上使郎中令李儒進醜曰服此
藥可以辟惡王曰我無疾是欲殺我耳乃與妻唐姬官人
飲讌別王悲歌曰天道易兮我向艱奔萬乘兮退居蕃逆
臣見迫兮命不延逝將去汝兮適幽玄因令唐姬起舞姬
抗袖而歌曰皇天崩兮后土頽身爲帝王兮命天摧死生
路異兮從此乖奈我煢獨兮心中哀因泣下嗚咽王曰卿
王者妃勢不復爲吏民妻自愛從此長辭遂飲醜死時年
十八

漢名臣奏曰杜業奏曰河閒獻王經術通明積德累行天
下雄駿衆儒皆歸之孝武帝時獻王朝武帝色難之謂獻

王曰湯以七十文王百里王其免之知其主意即縱酒聽
樂因以終也

漢雜事曰中元二年光武崩王莽之亂國無制度皇太子
與諸王同席坐尊卑無別是時上下莫之是正太尉趙喜
乃正色橫劍殿階扶下諸王以明尊卑

魏略曰任城王彰字子文武帝子也太子嗣立既葬遣彰
之國始彰自以先生見任有功翼因此見授用而聞當隨
例意甚不悅不待遣而去時以陽陵堦薄使治中牟及帝
受禪因封爲中牟王是後六駕幸許昌北州諸使上下畏
其剛嚴每過中牟不敢不速

又曰趙王朝幹一名良良本陳妾子良生而陳氏死太祖
令王夫人養之良年五歲而太祖疾因遺令語太子言此
兒三歲亡母五歲失父以累汝太子因是親待隆於諸弟

良年小常呼文帝為阿翁帝謂良曰我汝兄耳愍其如是每為涕淚

受賜因持酒中奉王景翁大驚幸舊昌此限蕭對生不異
附意其不封不封彭頭去律以調製祭神對中奉又氣
之四散章自以次港只丑部收其因北良對朕而問當謂
太平御覽卷第一百五十

太平御覽卷第一百五十
其間蕭景儀中奉不流不封
受賜因持酒中奉王景翁大驚幸舊昌此限蕭對生不異
附意其不封不封彭頭去律以調製祭神對中奉又氣
之四散章自以次港只丑部收其因北良對朕而問當謂
太平御覽卷第一百五十

太平御覽卷第一百五十一

皇親部十七

諸王下

王妃

魏志曰鄧哀王冲字蒼舒少聰蔡岐嶷生五六歲智慧所
及有若成人之知孫權曾致巨象太祖欲其知斤重訪之
羣下咸莫能出其理冲曰置象大舡之上而刻其水痕所
至稱物以載之則校可知矣太祖大悅時軍國多事用刑
嚴重太祖馬鞍在庫而為鼠所齧庫史懼必死欲面縛首
罪猶懼不免冲謂曰待三日然後自歸冲於是以刃穿單
衣如鼠齧者謬為失意貌有愁色太祖問之冲對曰世俗
以為鼠齧衣者其主不吉今單衣見齧是以憂感太祖曰
此妄言耳無所苦也俄而庫吏以齧鞍聞太祖笑曰兒衣

在側尚蓄況鞍懸柱乎一無所問沖仁愛識達皆此類也
太祖數對群臣稱述有欲傳後意年十三疾病太祖親爲
請命及亡哀甚文帝寬喻太祖太祖曰此我之不幸而汝
曹之幸也

又曰中山王袞建安二十一年封平鄉侯少好學年十餘
歲能屬文每讀書文學左右常恐以精力爲病數諫止之
然性所樂不能廢也

又曰樂陵王茂性傲很少無寵於太祖及文帝世又獨不
王太和元年徙封聊城公其年爲王詔曰昔象之爲虐至
甚而舜猶侯之有庠近漢氏淮南阜陵皆爲亂臣逆子而
錫土有虞建之於上古漢文明帝行之于前代斯皆敦敘
親親之厚義也聊城公茂少不閑禮教長不務善道先帝
以爲古之立諸侯也皆命賢者故姬姓有未爲侯者是以

獨不王茂太皇太后數以爲言如聞茂頃來少知悔昔之
非今封茂爲聊城王以慰太皇太后下流之念

又曰任城威王彰字子文少善射御膂力過人手撿猛獸
不避險阻數從征伐志意慷慨太祖常抑之曰汝不念讀
書慕聖道而好乘汗馬擊劍此一夫之用何足貴也或諫
彰讀書彰謂左右曰大丈夫一爲衛霍將十萬騎馳沙漠
驅戎狄立功建號耳何能爲博士耶

又曰陳思王植字子建年十餘歲讀誦詩論及辭賦數十
萬言善屬文太祖嘗視其文謂植曰汝倩人耶植跪曰言
出爲論下筆成章願當面試奈何倩人時鄴銅爵臺新成
太祖悉將諸子登臺使各爲賦植援筆立成可觀太祖甚
異之性簡易不治威儀與馬服飾不尚華麗每進見難問
應聲而對特見寵愛

蜀志曰魯王永字公壽初永憎宦人黃皓皓既信任用事構永於後主稍疏外永至不得朝見者十餘年
吳書曰南陽王和字子孝被譴之長沙行過蕪湖有鵲巢于帆牆故官僚聞之皆憂慘以爲檣非久安之象或言鵲巢之詩有積行累功以致爵位之言今王至德茂行當復國土黨神靈以此告寤人意乎
吳志曰魯王霸字子威和同母弟也和爲太子霸爲魯王寵愛崇特與和無殊頃之和霸不穆之聲聞於權耳權禁斷往來假以精學

又曰齊王奮字子揚居武昌權薨太博諸葛恪不欲諸王處江濱兵馬之地徙奮於豫章奮怒不從命又數越法度恪上牋諫曰帝王之尊與天同位是以家天下臣父兄大王宜上惟太伯順父之志中念河間獻王東海王疆恭敬

之節下當裁抑驕恣荒亂以爲警戒

晉書曰安平獻王孚世祖受禪爲太宰一門三世同時十人封王二人世子父子位極人臣子孫咸居大官出則旌旗節鉞入則貂蟬袞冕自公族之寵未始有也享年九十然而夙夜滋恭恒有履冰之懼

又曰安平王孚武帝以孚明德屬尊當宣化樹教爲羣后作則遂備置官屬焉又以孚內有親戚外有交遊惠下之費而經用不豐奉綰二千疋及元會詔孚輿車上殿帝於階迎拜既坐帝親奉觴上壽如家人禮帝每拜孚跪而止之又給以雲母輦青蓋車孚雖見尊寵不以爲榮常有憂色

又曰安平獻王孚性通加以貞白自立未嘗有怨於人陳留殷武有名於海內嘗罹罪譴孚往省之遂與同處分食

談者稱焉

又曰平原王幹字子良宣帝子太始元年封平原王邑萬一千三百戶四年給鼓吹駙馬二疋使服侍中之服幹不治國事雖有爵祿若不在身所得俸秩皆露積腐爛齊王問爲長沙王父所殺幹哭之哀謂左右曰宗室轉衰唯此兒最可而復害之從今殆矣

又曰文帝崩齊王攸率禮過哀上以攸至孝毀甚二年五月文明皇太后親臨省攸攸毀瘠塵黑貌不可識太后留攸慰撫旬日還中詔勉攸曰若萬一加以他疾將復如何宜速慮深思不可專守一意以陷於不孝若後不從往言當遣人監守飲食

又曰武帝子父字仕慶封長沙王性果厲有威斷初入洛謂成都王曰天下先帝之業王宜維之時齊王罔已至聞

又言者皆憚之

又曰成都王穎字章度武帝子拜屯騎校尉加散騎常侍形狀美而神明少乃不知書

又曰梁孝王彤宣帝子拜大將軍領西戎校尉因大會語王銓曰我從兄爲尚書令不能啖大臠銓知彤求爲尚書令荅曰下邳王爲令與天下共嚼啖大臠故難公在此獨嚼彤曰長史大臠誰耶銓荅盧播是彤曰是吾家吏隱忍之耳銓曰天下皆王家吏王法可不復行之耶

又曰齊王攸好學不倦借人書皆爲治護時還有水旱則出租秩加賤以賑國人須豐年乃收入本直太康三年詔齊王攸當出方嶽遂撫其國加都督青州增封濟南郡備物典策軒懸之樂六佾之舞賜黃鉞朝車乘輿之副晉陽秋曰齊王罔輔政士以牛酒郊勞平原王幹獨齎百

錢于懷賀之王問神如士以晉中興書曰譙王丞鎮湘州至武昌釋軍備見王敦敦因宴集謂丞曰大王雅素佳士非將御才也丞曰公未盡耳安知鉛刀不能一割丞以敦欲測其情故發此言敦果謂錢鳳曰彼不知懼而學壯語此之不武何能為聽丞之鎮又曰武陵威王晞為桓溫所收忠勦王少子也被廢後新安王遵初封新寧王年十二受拜流涕哀感左右將軍桓伊嘗造遵怒門人曰何通桓氏門人曰桓伊與桓溫疎宗相見無嫌遵曰我聞人姓木邊便欲殺之況說相乎由是少稱聰察及長輒凡退無復名望晉百官表曰王古號也夏殷周稱王金璽龜鈕纁朱綬五時朝服遠遊冠佩山玄王沈約宋書曰彭城王義康性好吏職銳意文案糾剔是非

凡所陳奏入無不可方伯並委義康授用由是朝野輻湊勢傾天下義康亦自疆不息無有懈倦

又曰南郡王義宣為荊州刺史白皙美鬚眉長七尺五寸腰帶十圍多畜嬪媵後房千餘尼媪數百男女四十人崇飾綺麗費用殷廣

又曰江夏王義恭性嗜不恒與時移變自始至終屢遷第宅與人遊款意好亦多不終而奢侈無度不愛財寶前廢帝狂勃無道義恭元景等謀欲廢立永光元年八月廢帝親率羽林兵於第害之并其四子時年五十三斷折義恭支體分裂腸胃挑取眼睛以蜜漬之謂之為鬼目粽又曰衡陽王義季為荊州刺史先是臨川王義慶在任巴蜀亂擾師旅應接府庫空虛義季躬行節儉蓄財省用數年間還復充實隊主續豐母老家貧無以充養遂斷不食

肉義季哀其志給豐母月白米二斛錢一千并制豐噉肉
義季素拙書上聽使餘人書啓事唯自署名而已二十一
年徵爲都督南徐兗青冀幽六州諸軍事南兗州刺史登
舟之日帷帳器服諸應隨刺史者悉留之荆楚以爲美談
又曰桂陽王休範進位司空休範素凡訥少知解不爲諸
兄所舉遇太宗常指左右人謂王景文曰休範人才不及
此以我弟故生便富貴釋氏願生王家良有以也
又曰建平宣簡王宏字休度文帝第七子也少而閑素篤
好文籍太祖寵愛殊常爲立第鷄籠山盡山水之美建平
國高他國一階

又曰晉平王休祐貪淫好財色在荊州列所營財貨以短
錢一百賦民田登求白米一斛皆令徹白若折者悉簡糶
此米一升一百至時又不受米平米責錢凡諸求皆如此

蕭子顯齊書曰賁陵王子良字雲英少有清尚禮才好士
居不疑之地傾意賓客天下才學皆遊集焉

後魏書曰河南王平原拜齊州刺史善於懷撫邊民歸附
者千有餘家時歲頻不登齊民飢饉平原以私米三千餘
斛爲粥以全民命北州戍卒一千餘人還者皆給路糧百
姓咸稱詠之州民韓凝之等千餘人闕頌之高祖覽而嘉
歎

又曰任城王澄字道鏡少好學文明太后引見誠厲之顧
謂中書令李冲曰此兒風神秀發德音閑婉當爲宗室領
袖後爲中書令改授尚書蕭蹟使庾革來朝革見澄音韻
適雅風儀秀逸謂主客郎張彞曰往魏任城以武著稱今
魏任城乃以文見美也
又曰安定王休少而聰慧治斷有稱車駕南伐領大司馬

高祖親行軍遇休以三盜人徇於軍將斬之有詔赦之休
執曰陛下親御六師跋涉野次軍行始爾已有奸竊如其
不斬何以息盜請必行刑以肅奸匪詔曰大司馬執憲誠
應如是但因緣會朕聞王者之體亦應有非常之澤雖違
軍法可特原之休乃奉詔高祖謂司徒馮誕曰大司馬嚴
而秉法諸君不可不慎於是六軍肅然
又曰永昌王健姿貌魁壯善弓馬達兵法所征戰常有
功才藝比陳留桓王而知略過之
又曰臨淮王彧字文若少有才學時譽甚美侍中崔光見
彧退而謂人曰黑頭三公當此人也瑯琊王誦有名人也
見之未嘗不心醉忘疲
又曰東平王匡字建扶性耿介有氣節高祖器之謂曰叔
父必能儀形社稷匡輔朕躬今可改名爲匡世宗卽位時

茹皓始有寵百寮微憚之世宗曾於山陵還詔匡陪乘又
命皓登車皓褰裳將上匡諫止世宗推之令下當時壯其
忠譽

又曰廣陵王羽字叔鸞少而聰惠有斷獄之稱領廷尉高
祖幸羽第與諸弟言曰朕昨親受民訟始知廣陵之明了
咸陽王禧對曰臣年爲廣陵兄明爲廣陵弟高祖曰我爲
汝兄汝爲羽昆汝復何恨
又曰彭城王勰字彥和小而岐嶷姿性不羣勰生而母潘
氏卒及有所知啓求追服文明太后不許乃毀瘠三年不
參吉慶高祖大奇之敏而耽學不捨晝夜博綜經史雅好
屬文從征河北破新野南陽高祖令勰爲露布勰辭曰臣
聞露布者布於四海露之耳目必須威示天下以臣小才
豈足大用高祖曰但可爲之及就尤類帝文有不見者咸

謂御筆高祖曰汝所爲者人謂吾制非兄則弟誰能辯之
北史齊安德王延宗文襄第五子母陳氏廣寧王伎也延
宗幼爲文宣所養年十二猶騎置腹上令溺已齊中抱之
曰可憐止有此一箇問欲作何王對曰欲衝天王文宣問
楊愔愔曰天下無此郡名願使安於德於是封安德焉
隋書曰楊雄高祖族子也初封清漳王仁壽初高祖曰清
漳之名未允聲望命職方進地圖上指安德郡以示羣臣
曰此號足爲名德相稱於是改封安德王
唐書曰紀王慎爲貝州刺史慎少好學長於文吏皇族中
與越王貞齊名時人號爲紀越
賈誼書曰高皇帝分天下以王有功之臣反者如蝟毛而
起高皇帝以爲不可是故去不義諸侯空其國擇良日立
諸子雒陽上東門之外諸子畢王而天下乃安

蔡邕獨斷曰漢制皇子封爲王其實諸侯也周末諸侯或
稱王故以王號加之愍名諸侯王法律家皆曰列侯天子
大社以五色土爲壇皇子封爲王者受天子太社之土以
所封之方色東方受青南方受赤他各以其方色藉以白
茅歸國以立社稷謂之茅土

王妃

史記曰趙王友以諸呂女爲后弗愛愛他姬諸呂女妬怒
讒之太后誣以罪太后怒以故召趙王趙王至置邸不見
命衛士圍守之弗與食趙王餓迺歌曰諸呂用事兮劉氏
危迫魯王侯兮強授我妃我妃既妬兮誣我以惡讒女亂
國兮上曾不寤○續漢書曰樂安陳夫人孝質皇帝母也
家本魏郡少以伎入孝王家得幸生質帝梁冀欲專國權
令帝母不得至京都又帝短祚是以外家無他寵帝拜夫

人爲王妃

范曄後漢書曰董卓置弘農王於閣上使郎中令李儒進
醜王乃與妻唐姬及宮人別坐者皆獻欵王謂姬曰卿王
者妃勢不復爲吏臣妻自愛從此長辭遂飲藥而死時年
十八唐姬潁川人也王薨歸鄉里父欲嫁之姬誓不許及
李儒破長安遣兵抄關東略得姬儒因欲妻之不聽而終
不自名尚書賈詡知之以狀白獻帝帝聞感愴乃下詔迎
姬置園中使侍中持節拜爲弘農王妃

魏志曰中山恭王袞袞得病詔遣太醫視疾又遣太妃沛
王林並就省疾

又曰彭城王據建安十六年封范陽侯以環太妃彭城人
徙封彭城

吳志曰吳主孫權謝夫人會稽山陰人也父暉權聘以爲

妃愛幸有寵後權納姑孫徐氏欲令謝下之不肯由是失
志早卒

又曰吳主孫權徐夫人吳郡富春人也祖父眞與權父堅
相親堅以妹妻眞生琨琨生夫人初適同郡陸尚尚卒權
爲討虜將軍在吳娉以爲妃後母養子登後權遷移以夫
人妬忌廢處吳積十餘年尋卒

臧榮緒晉書曰賈充前妻李氏生二女荃濬禁錮解荃等
屢請充迎其母而父不判充當鎮關中屯軍城西爲供帳
受百官餞荃濬遂突出於坐中叩頭流血訴充并陳說群
客以母應還之意荃是齊獻王之妃衆賓皆驚起散出充
甚愧愕

晉中興書曰海西李皇后庾氏字道憐司空冰女也初爲
海西王妃海西卽位拜爲皇后泰和元年崩葬敬平陵帝

廢追貶海西公夫人無子

又曰簡文皇后王氏字蘭姬后以冠族太宗納焉初爲會稽王妃生子道生爲世子並失太宗意后及道生俱被幽廢以憂薨烈宗踐祚追尊曰順皇后

又曰中宗母太妃夏侯氏字光姬一字銅環太妃爲恭王妃生中宗王薨中宗嗣立稱王太妃永嘉元年薨還葬瑯琊

又曰元敬皇后虞氏字孟母濟陽外黃人中宗之爲王納后爲妃永嘉六年薨

又曰康獻皇后褚氏字蕞太傅裒之女也后以名家人爲瑯琊王妃生孝穆皇帝

蕭子顯齊書曰隨郡王子隆字雲興娶尚書令王儉女爲妃上以子隆能屬文謂儉曰我家東阿重出實爲皇家蕃

屏

後魏書曰元匡爲太宗正卿河南邑中正奏親王及始蕃二蕃王妻悉有妃號而三蕃已下皆謂妻上不得同爲妃名而下不如五品已上有命婦之號竊以爲疑詔曰夫貴於朝妻榮於室婦人無定陟降從夫三蕃旣啓王封妃名亦宜同等妻者齊也理與己齊可從妃例自是三蕃王妻名號始定

又曰陽平王顯詔曰顯所生親李誕育懿胤儀刑藩國母緣子貴義著春秋可授陽平王太妃以申典例

神明之後也舜聖故謂庸以元女大姬配胡公庸用也元

長女胡公闕而封諸陳以備三恪周得天下封夏殷二王

父之子滿也而封諸陳以備三恪後又封舜後謂之恪并

二王後為三國其禮轉降示敬而已故曰三恪

又莊元年曰單伯送王姬王將嫁女子于齊命魯為主故單

伯送天子嫁女於諸侯使同姓

諸侯主之不親築王姬之館于外

昏尊卑不敵

公羊傳曰天子嫁女子于諸侯天子至尊不自主婚必使諸

侯同姓者主之史記曰嫫女天孫也

又曰公叔相魏尚魏公主而害吳起公叔之僕曰易去也

魏相曰奈何其僕曰吳起為人節廉而自喜名也君因先

與武侯言曰夫吳起賢人也而侯之國小又與強秦壤界

竊恐吳起之無留心也侯即曰奈何因謂侯曰恐試近以

公主起有留心則必受無留心則必辭侯以此卜之君因

召吳起而與歸即令公主怒而輕君起見公主之輕君出

則必辭於是吳起見公主之賤魏相果辭魏武侯武侯

疑之而不信也

又曰李斯長男由為三川守諸男皆尚秦公主諸女悉嫁

諸公子由告歸咸陽斯置酒于家百官長皆前為壽門庭

車騎以千數

漢書曰單于兵強數苦北邊上問婁敬敬曰陛下誠能以

嫡公主妻單于厚奉遺之彼知漢女送厚蠻夷必慕以為

闕氏生子必為太子豈曾聞外孫與大父抗禮哉

又曰周勃下廷尉吏侵辱之勃以千金與獄吏獄吏遇書

牘背示之曰以公主為證公主孝文女也勃子勝尚之故

獄吏教引

又曰宣平侯張敖尚惠帝姊魯元公主有女惠帝即位呂

太后欲為重親以公主女配帝

又曰孝武衛皇后字子夫爲平陽主謳者武帝卽位數年無子過平陽主旣飲謳者進帝獨說子夫帝起更衣子夫侍尙衣軒中得幸還坐甚忻賜平陽主金千斤子夫上車主拊其背曰行矣強飯勉之卽貴願無相忘

又曰烏孫以馬千疋媵女漢元封中遣江都王建女細君爲公主以妻焉賜乘輿服御物爲備官屬侍御數百人贈送甚盛烏孫昆莫以爲右夫人公主至其國自治宮室昆莫年老言語不通公主悲愁自爲作歌天子聞而憐之遣使持帷帳錦繡給遺焉

又曰林慮公主子昭平君尙武帝女夷安公主林慮病困以金千斤錢千萬爲昭平君贖死罪帝許之林慮公主卒昭平日驕醉殺主傅母繫獄廷尉上請左右爲言前入贖陛下許之帝曰吾姊老有是一子死以囑我故於是爲之垂涕良久曰法令先帝所造因姊故而誣先帝之法吾何面目入高廟乎遂可其奏

又曰昭帝始立年八歲帝長姊鄂邑蓋長公主居禁中共養帝長公主私通客河間丁外人上與大將軍聞之不絕主懼有詔外人侍長主

又曰初帝姑館陶公主號竇大主堂邑侯陳牛尙之牛死主寡居年五十餘矣董偃始與母以賣珠爲事年十三隨母出入主家左右言其姣好召見曰吾爲母養之因留第中教書計相馬御射頗讀傳記至年十八冠出則執轡入則侍內爲人溫柔愛人以故諸公接之名稱城中號曰董君

又曰梁王以至親故得自置相二千石出入遊戲僭於天子天子聞之心不善太后知帝弗善迺怒梁使者弗見按

責王所為梁使見太長公主如淳曰景而泣曰何梁王為人子之孝為人臣之忠太后曾不省也長公主具以告太后太后喜為帝言之帝心迺解

又曰烏孫公主遣女來至京師學鼓琴漢遣侍郎樂奉送主女過龜茲龜茲前遣人至烏孫求公主女未還會女過龜茲龜茲玉器留不遣復使使報公主公主許之後公主上書願令女比宗室入朝而龜茲王降賓亦愛其夫入上書言得尚漢外孫為昆弟願與公主女俱入朝後數求朝賀樂漢衣服制度歸其國治宮室作微道周衛出人傳呼如漢家儀外國胡人皆曰驢非驢馬非馬若龜茲王所謂驪也

又曰薩宣封為侯時妻死而敬武馬公主寡居上令宣尚馬及官免歸故郡公主留京師後宣卒主上書願還宣葬

延陵奏可其子況私從燉煌歸長安會赦因留與主私亂後漢書曰漢制皇女皆封縣公主儀服同列侯其尊崇者加號長公主儀服同蕃王諸王女皆封縣亭公主儀服同鄉亭侯肅宗唯特封東平獻王蒼瑯琊孝王京女為縣公主其後安帝桓帝妹亦封長公主同之皇女皇女封公主者所生之子襲母封為列侯皆傳國于後鄉亭之封則不傳襲

又曰光武姊湖陽公主新寡帝與其論朝臣徵觀其意主曰宋公威容德器羣臣莫及帝曰方且圖之後宋弘被引見帝令主坐屏風後因謂弘曰嗛言貴易交當易妻人情乎弘曰臣聞貧賤之交不可忘糟糠之妻不下堂帝顧主曰事不諧矣又曰董宣為洛陽令時湖陽公主蒼頭白目殺人因匿主

家吏不能得及主出行而以奴驂乘宣於夏門候之乃駐車叩馬以刃畫地大言數主之失叱奴下車因杖殺之主卽還宮訴帝帝大怒召宣欲筆殺之宣叩頭曰願乞一言而死帝曰欲何言宣曰陛下聖德中興而縱奴殺良民將何以治天下乎臣不須筆請得自殺卽以頭擊楹血被面帝令小黃門持之使宣叩頭謝主宣不從帝強使頓之宣手據地終不肯俯主曰文叔爲白衣時藏亡匿死吏不敢至門今爲天子威不能行一令乎帝笑曰天子不與白衣同

又曰鄧晨初娶世祖姊元及漢兵起晨將賓客會棘陽兵敗世祖卽位封晨房子侯帝又感悼姊沒於亂兵追封謚元爲新野節義長公主立廟于縣西封晨長子汎爲吳房侯以奉公主之祀

又曰竇憲字伯度女弟立爲皇后憲恃宮掖聲勢遂以賤直請奪沁水公主園田主逼畏不敢計後肅宗駕出過園指以問憲憲喑鳴不能對

又曰班始尚清河孝王女陰城公主順帝之姑貴驕淫亂與所嬖人居帷中召始入使伏牀下始積怒永建五年遂拔刀殺主帝大怒腰斬始同產皆弃市

又曰竇融長子穆尚內黃公主子勳尚東海恭王疆女泚陽公主又子固亦尚世祖女涅陽公主竇氏一公兩侯三主親戚功臣中莫與爲比

又曰皇女義王建武十五年封舞陽公主適延陵鄉侯大僕梁松舞陽縣屬潁川郡梁統之子其傳云尚光武女舞陰公主又鄧訓傳舞陰公主子梁扈有罪與交通此云松坐誹謗誅

又曰皇女中禮十五年封涅陽公主適顯親侯大鴻臚竇

固混陽屬南陽郡顯親縣肅宗尊為長公主
皇女紅夫十五年封館陶公主適駙馬都尉韓光光坐與
淮陽王延謀反誅
 又曰館陶公主為子求郎明帝不許而賜錢千萬謂羣臣
 曰郎官上應列宿出宰百里苟非其人則民受其殃是以
 難之也
 又曰明帝永平二年少府陰就子豐殺妻酈邑公主就坐
 自殺
 續漢書曰印璽綬王公玉匣銀鏤夫人貴人長公主銅鏤
 謝承後漢書曰楊喬為尚書容儀偉麗數上書言政事相
 帝愛其才貌詔妻以公主喬固讓不聽遂閉口不食七日
 而死
 魏志曰明帝愛女淑薨追封謚淑為平原公主為之立廟

魏略曰初東阿王植到關自念有過宜當謝帝乃留其從
 官着關東將兩三人徵行見清河公主欲因主以謝而關
 吏以聞帝使人逆之不得太后以為自殺也對帝泣下
 魏末傳曰何晏婦金鄉公主即晏同母妹公主賢明謂其
 母沛王太妃曰晏為惡日甚將不保身母笑曰汝得無妬
 晏耶俄而晏死有一男年五六歲宣王遣人錄之晏婦藏
 其子王宮中向使者搏頰乞活使者具以白宣王宣王亦
 聞晏婦有先見之言心常嘉之且為沛王故特原不殺
 吳志曰朱據字子範吳郡人有姿貌乃尚公主拜左將軍
 封雲陽侯謙虛接士輕財好施
 晉書曰王濟字武子少知名尚武帝妹常山公主公主妬
 忌兩目失明終無子
 又曰武帝勅衛瓘第四子宣尚繁昌公主瓘自以諸生之

胄婚對徵素抗表固辭不許

又曰孫秀子會年二十爲射聲校尉尚帝女河東公主公主母喪未暮使納娉禮會形貌短陋奴僕之下者初時與富室兒於城西販馬百姓忽聞其尚主莫不駭愕

又曰桓溫尚南康公主溫與庾翼友善恒相期以寧濟之事翼嘗薦溫於明帝曰桓溫少有雄略願陛下勿以常壻畜之宜委以方郡之任託其弘濟艱難翼卒以溫爲都督荆梁四州諸軍事

又曰武帝爲晉陵主求壻王珣曰謝混雖不及劉眞長不減王子敬帝曰如此便足會帝崩索崧欲以女妻之珣曰卿莫近禁巒

臧榮緒晉書曰賈后二女宣華女彥封宣華弘農郡公主女彥年八歲聰明岐嶷便能書學諷誦詩論病困賈后欲

議封女彥語后曰我尚小未及成人禮不用公主及薨謚哀獻皇女以長公主禮送葬

又曰孝懷詹事裴紹息猷尚滎陽長公主紹字承伯秀從兄子猶不願婚聞詔在中書即娉溫嶠妹中丞傅宣奏猷大不効

又曰帝之姑姊妹皆爲長公主加綠綬

晉中興書曰王敦字處仲尚武帝女襄城公主天下大亂敦將還臺悉以主嫁時侍婢百餘人配給將士金寶一時弃捐

又曰臨海公主惠帝第四女羊皇后所生初封清河公主未出適值永嘉亂傳賣長城民錢溫溫以送女女遇主甚酷主自告吳興太守周禮以聞於是殺溫及女適譙國曹統

又曰南康宣公主與男明帝長女庾后所生初封遂安縣主適栢温吳興太守又曰新安愍公主道福簡文第三女徐淑媛所生適相濟重適王獻之

晉讚曰初衛瓘子宣尚世祖女繁昌公主宣遇黃門不厚致有讒構楊駿欲專朝政諷內外奪宣主權由此去位上會諸妃主議問主宣待汝薄今欲離汝意云何主素訥不能自申但泣泣是不欲離諸妃主因言泣是婦人重於再出故泣耳於是遂離與姊妹書稱故新婦

宋書曰公主納徵虎豹皮各一一又曰王偃字子游母晉孝武帝女弟鄱陽公主宋受禪封永成君偃尚宋武帝第二女吳興長公主諱榮男常傑偃縛諸庭樹時天夜雪霰凍久之偃兄恢排閣告主乃免偃

謙虛恭謹不以世事關懷位右光祿大夫贈開府儀同三司子藻位東陽太守尚文帝第六女臨川長公主諱英媛公主性妬而藻別愛左右人吳崇祖景和中主讒之於廢帝藻下獄死主與王氏離婚

又曰何瑀尚武帝少女豫章康長公主諱次男公主先適徐喬美容色聰敏有智數文帝世禮待特隆瑀豪蕩於時與平昌孟靈休東海何勗等並以輿馬相尚公主與瑀情愛隆密何氏疎戚莫不霑被恩紀

又曰趙倩尚文帝第四女海鹽公主甚愛重倩嘗因言戲以手擊主事上聞文帝離婚又曰褚湛之字休玄秀之子也尚宋武第七女治安公主拜駙馬都尉著作佐即公主薨復尚武帝第五女吳郡宣公主諸尚主者並因世胄不必皆有才能湛之謹實有意

膾封枝江縣侯數歲與弟淳之共車行牛奔車壞左右人
馳來赴之湛之先令取弟衆咸歎其幼而有識及長頗涉
文義事祖母及母以孝聞元嘉中爲黃門侍郎祖母年老
辭以朝直不拜後拜祕書監會稽公主身居長嫡爲文帝
所禮家事大小必諮而後行西征謝晦使公主留止臺內
摠攝六官每不得意輒號哭上甚憚之初武帝微時貧陋
過甚常自往新洲伐荻有納布衣襖等皆是敬皇后手自
作武帝旣貴以此衣付公主曰後世若有驕奢不節者可
以此衣示之湛之爲大將軍彭城王義康所愛與劉湛等
頗相附及劉湛得罪事連湛之文帝大怒將致大辟湛之
憂懼無計以告公主公主卽日入宮旣見文帝因號哭下
牀不復施臣妾之禮以錦囊盛武帝納衣擲地以示上曰
汝家本貧賤此是我母爲汝父作此納衣今日有一頓飽

食便殘害我兒子上亦號哭湛之由此得全
又曰王僧綽幼有大成之度衆便以國器許之好學練悉
朝典年十三父曇首卒文帝引見拜便流涕哽咽上亦悲
不自勝襲封豫寧縣侯尙文帝長女東陽獻公主初爲江
夏王義恭司徒參軍累遷尙書吏部郎參掌大選宏識流
品任舉咸盡其分
又曰宋世諸公主莫不嚴妬明帝每疾之湖熟令表愾妻
以妬賜死使近臣虞通之撰妬婦記左光祿大夫江湛孫
敷尙孝武帝女上乃使人爲敷作表讓婚曰伏承詔旨當
以臨海公主降嬪臣寒門悴族人凡質陋閭閻有對本隔
天姻如臣素流家貧業寡年近將冠皆已有室荆釵布裙
足得成禮自晉氏已來配尙公主者雖累經美胄亟有名
才至如王敦懾氣栢温斂威眞長佯愚以固辭子敬炙足

以求免王偃無仲都之質而裸雪於北階何瑀闕龍工之
姿而見投於深井謝莊殆自同於矇矓躬仲幾不免於強
鉏制勒甚於僕隸防閑過於婢妾行來出入人理之常當
待賓客朋從之義而令掃轍息駕無窺門之期廢筵抽席
絕接對之理非唯交友離異仍乃兄弟踈闊姆姊爭媚相
勸以嚴妮媼競前相諂以急其閒又有應荅問訊卜筮師
母乃至殘飲餘食辨詰與誰衣被故弊必責頭領或進不
獲前或入不聽出入則嫌於欲踈出則疑有別意召必以
三更爲期遣必以日出爲限夕不見晚魄朝不識曙星至
於夜步月而弄琴晝拱袂而披卷一生之內與此長乖又
聲影才聞則少婢奔迸裙袂向席則醜老叢來左右整刷
以疑寵見嫌賓客未冠以少容致斥如臣門分代荷殊榮
足定家聲便預提拂清官美宦或由才升一叨婚戚戚成

恩假是以仰冒非宜披露丹質非唯上陳一己規全身之
願寔乃廣申諸門受惠之切伏願天慈照察特賜蠲停若
恩制頒降披請不申便當刊膚剪髮投山竄海帝以此表
遍示諸主以諷切之并爲戲笑

梁書武帝諸女臨安安吉長城三主並有文才而安吉最
得令稱

又曰王琳字孝璋位司徒左長史琳齊代娶梁武帝妹義
興昭長公主有子九人並知名長子銓字公衡美風儀善
占吐尚武帝女永嘉公主拜駙馬都尉銓雖學業不及弟
錫而孝行齊焉時人以爲錫銓二王可謂玉昆金友母長
公主疾銓形貌瘠貶人不復識及居喪哭泣無常因得氣
疾位侍中丹陽尹卒於衛尉卿
又曰柳偃字彥游年十二梁武帝引見詔問讀何書對曰

尚書又問有何美句對曰德惟善政政在養人衆咸異之
詔尚武帝女長城公主拜駙馬都尉

又謝覽字景滌尚齊錢唐公主拜駙馬都尉武帝平建業
朝士皆拜覽時年二十餘爲太子舍人長揖而已意氣閑
雅視瞻聰明武帝目送良久謂徐勉曰覺此生芳蘭音體
想謝莊正當如此自此乃被賞味

又曰謝眺及殷叡素與梁武以文章相得帝以大女永興
公主適叡子鈞第二女永世公主適眺子謨及帝爲雍州
二女並暫隨母向州及帝卽位二公主始隨內還武帝意
薄謨又以門單欲更適張弘策子弘策卒又以與王志子
謹而謨不堪歎恨爲書狀如詩贈公主公主以呈帝甚加
矜歎而婦終不得還尋用謨爲信安縣稍遷王府諮議
又曰殷叡子鈞尚武帝永興公主自宋齊已來公主多驕

淫無行永興公主加以險虐鈞形貌短小爲公主所憎每
被召入先滿壁爲殷叡字鈞輒流涕以出主命婢束而反
之鈞不勝怒而言於帝帝以屣如意擊主碎於背然猶恨
鈞

又曰張纘字伯緒纘年十一尚武帝第四女富陽公主拜
駙馬都尉封利豪亭侯召補國子生起家秘書郎時年十
七身長七尺四寸眉目踈朗神采爽發武帝異之嘗曰張
壯武云後八世有逮吾者其此子乎

後魏書曰金根車公主封君皆乘之但右駢而已
又曰太祖嘗引崔玄伯講論漢書至婁敬說漢高祖欲以
魯元公主妻匈奴善之嗟嘆良久是以諸公主皆釐降于
賓附之國

又曰陸昕之風望端雅尚常山公主拜駙馬都尉公主奉

姑有孝稱初與穆氏琅琊長公主茲並爲女侍中又性不妬忌以昕之無子爲納妾媵而皆育女公主有三女無男以昕之從兄希道第四子彰爲嗣

又曰蕭寶寅尚南陽長公主賜帛一千疋并給禮具公主有婦德事實寅盡肅雍之禮好合雖積年而敬事不替寶寅每入室公主必立以待之相遇如賓自非太妃疾篤未曾歸休寶寅器性溫順自處以禮奉敬公主內外諧穆清河王懌親而重之

又曰馮穆尚順陽公主宋翻爲河陰令公主家奴爲劫擄而不送翻將兵圍主宅執主壻馮穆步驅向縣時正炎暑立之日中流汗霑地

又曰陳留公主寡居泰州刺史張彞意願尚主主亦許之僕射高肇亦望尚主主意不可肇怒譖彞於世宗停廢數

年

又曰高道穆爲御史中尉莊帝姊壽陽公主行犯清路執赤棒卒呵之不止穆令棒破其車公主深以爲恨泣以訴帝帝謂主曰高中尉清貞之人彼所行者公事豈可以私責之又曰宿石元明帝時拜中壘將軍嘗從獵帝親欲射虎石扣馬諫引帝上高原上後虎騰躍殺人詔石爲忠臣切諫免虎之害賜馬一疋尚上谷公主拜駙馬都尉

又曰劉昶尚武邑公主主薨更尚建興公主又尚平陽長公主及昶終與三公主同塋異穴

又曰劉輝字重昌正始初尚蘭陵長公主世宗第三姊也公主頗嚴妬輝嘗私幸主侍婢有身主笞殺之割其孕子節解以草裝實婢腹裸以示輝輝遂忿憾疎公主公主妹因入聽講言其故靈太后太后初勅清河王懌窮其事懌

與高陽王雍廣平王懷奏其不和之狀無可爲夫婦之禮
請離婚削除封位太后從之

又曰嵇拔世爲訖奚部帥其父根皇始初率衆歸魏太祖
嘉之拔尚華陰公主生子敬元紹之逆也公主有功超授
敬大司馬封長樂王

又蠕蠕國太昌元年六月阿那瓌遣使朝貢并爲長子請
尚公主孝武詔以范陽王誨之長女琅琊公主許之未及
成婚帝入關東西魏競結阿那瓌爲婚好西魏文帝乃以
孝武時舍人元翌女稱爲化政公主妻那瓌兄弟塔寒又
曰阿那瓌遣使朝貢復因求婚詔以常山王儻妹樂安公
主許之改封爲蘭陵郡長公主阿那瓌奉馬千疋以爲娉
禮請迎公主詔兼宗正卿元壽兼太常卿孟詵等送公主
自晉陽北邁資用器物咸出豐渥阿那瓌遣迎公主於新

城之南

陳書沉君理美風儀博涉有識鑒陳武帝鎮南徐州深見
器重命尚會稽長公主及帝受禪拜駙馬都尉封永定亭
侯爲吳郡太守時兵革未寧百姓荒弊君理摠集士卒修
飾器械深以幹理見稱

又曰蔡凝字子居美容止及長博學有文詞九工章隸累
遷太子中舍人以名家子選尚信義公主拜駙馬都尉中
書侍郎遷晉陵太守及將之郡更令左右修中書廨宇謂
賓友曰庶來者無勞尋授吏部侍郎凝年位未高而才地
爲時所重常端坐西齋自非素貴名流罕所交接趣時者
多譏焉宣帝嘗謂凝曰我欲用義興主壻錢肅爲黃門郎
卿意何如凝正色曰帝戚恩由聖旨則無所復問若格以
僉議黃散之職故須人門兼美帝默然而止肅聞而不下

義興公主日譖之尋免官遷交阯

後周書尉遲侯兜性弘裕有鑒識尙太祖姊昌樂大長公主生迥及綱侯兜病且卒呼二子撫其首曰汝等並有貴相但恨吾不見爾各宜勉之

隋書曰文帝時蘭陵公主寡上爲之求夫選親衛柳述及蕭瑒等以示相者孫鼎鼎曰瑒當封侯而無貴妻之相述亦通顯而守位不終上曰位由我耳遂以主降述

又曰蘭陵公主字阿五高祖第五女也美姿儀性婉順好讀書高祖於諸女中特所鍾愛初嫁儀同王奉孝卒適河東柳述時年十八諸姊並驕踞主獨折節遵於婦道事舅姑甚謹遇有疾病必親奉湯藥高祖聞之大悅由是述漸見寵遇初晉王廣欲以主配其妃弟蕭瑒高祖初許之後遂適述晉王因不悅及述用事彌惡之高祖旣崩述徙嶺

表煬帝令主離絕將改嫁之公主以死自誓不復朝謁上表請免主號與述同徙帝大怒曰天下豈無男子欲與述同徙耶主曰先帝以妾適于柳家今有罪妾當從坐願陛下屈法申恩帝不從主憂而卒

又曰南陽公主煬帝長女也美風儀有志節造次必以禮年十四嫁許國公宇文士及以謹肅聞及述病且卒主親調飲食手自奉上世以此稱之及宇文化及逆弒主隨至聊城而化及爲竇建德所敗士及自濟北西歸大唐時隋代衣冠並在其所建德引見之莫不惶懼失常唯主神色自若建德與語主自陳國破家亡不能報怨雪恥淚下盈襟聲辭不輟情理切至建德及觀聽者莫不爲之動容墮涕咸肅然敬異焉及建德誅化及時主有一子名禪師年且十歲建德遣武賁郎將于士澄謂主曰宇文化及躬行

弑逆人神所不容今將族滅其家公主之子法當從坐若不能割愛亦聽留之主泣曰武賁既是隋室貴臣此事何須見問建德竟殺之主尋請建德削髮為尼

士及右衛將軍述之子也

以父勳封新城縣公隋文帝嘗引入卧內與語奇之令尚煬帝女南陽公主

太平御覽卷第一百五十三

唐書竇抗母隋文帝萬安公主抗在隋以帝甥甚見崇寵文帝幸其第命抗及公主酣宴如家人之禮也又曰隋煬帝至鴈門為突厥所圍蕭瑀進謀曰臣聞始畢託校獵至此義成公主初不知其有違背之心且此蕃夷俗可賀敦知兵馬事昔漢高解平城圍乃是闕氏之力況義成以帝女為妻必恃大國之援若發一單使以告義成假使無益事亦無損煬帝從之發使詣可敦諭旨俄而突厥解圍而去於後獲其謀人云義成公主遣使告急於始畢稱北方有警由是突厥解圍蓋義成公主之助也

太平御覽卷第一百五十四

皇親部二十

公主下

公主下

駙馬

唐書竇抗母隋文帝萬安公主抗在隋以帝甥甚見崇寵文帝幸其第命抗及公主酣宴如家人之禮也

又曰隋煬帝至鴈門為突厥所圍蕭瑀進謀曰臣聞始畢託校獵至此義成公主初不知其有違背之心且此蕃夷俗可賀敦知兵馬事昔漢高解平城圍乃是闕氏之力況義成以帝女為妻必恃大國之援若發一單使以告義成假使無益事亦無損煬帝從之發使詣可敦諭旨俄而突厥解圍而去於後獲其謀人云義成公主遣使告急於始畢稱北方有警由是突厥解圍蓋義成公主之助也

又曰凡公主封有以國名者鄆國代國霍國是也有以郡名者平陽宣陽東陽是也有以美名者太平樂安長寧是也唯玄宗之女皆以美名名之

又曰高祖平陽公主起義兵公主於鄆縣莊散家資招引山中亡命得數百人以應高祖略地至盤屋武功始平皆下之每申明法令禁兵士無得侵掠故遠近奔赴者甚衆得兵七萬人公主閒使以聞使者至高祖大悅及義軍渡河公主引精兵萬餘與太宗會於渭北與其駙馬柴紹各置幕府營中號爲娘子軍京城平封爲平陽公主以獨有功每賞賜異於他主及薨諡曰昭

又曰竇誕竇抗第三子也尙高祖女襄陽公主竇氏自武德至今男爲外戚尙主者八人女爲王妃六人唐世貴盛莫與爲比

又曰房玄齡之子遺愛尙高陽公主玄齡病上表諫征遼太宗見表謂玄齡子婦高陽公主曰此人危懼如此尙能憂我國家

又曰房遺愛尙太宗女高陽公主拜駙馬都尉初主有寵於太宗遺愛旣驕姿謀黜遺直而奪其封爵永徽中誣告遺直無禮於己高宗令長孫無忌鞠其事因得公主與遺愛謀反之狀遺愛伏誅公主賜自盡

又曰杜如晦之子荷以功臣子尙城陽公主賜爵襄陽郡公授尙乘奉御貞觀中與太子承乾謀反坐斬

又曰高士廉子履行尙太宗女東陽公主拜駙馬都尉遭父艱居喪以孝聞太宗手詔敦喻曰古人立孝毀不滅身聞卿絕粒殊乖大禮幸抑摧裂之情割傷生之累俄起爲衛尉卿

又曰蕭瑀子鏡尚太宗襄城公主公主雅有禮度太宗每令諸公主凡厥所爲皆視其楷則又令所司別爲營第公主辭曰婦人事舅姑如事父母若居處不同則定省多關再三固讓乃止

又曰王瑋子敬直尚南平公主禮有婦見舅姑之儀自近代公主出降此禮皆廢瑋曰今主上欽明動循法制吾受公主謁見豈爲身榮所以成國家之美耳遂與其妻就位而坐令公主親執筭行盥饋之道禮成而退是後公主下降有舅姑者皆備婦禮自瑋始也

又曰貞觀中長樂公主出降太宗以皇后所生勅有司資送倍於永嘉長公主秘書監魏徵諫曰不可昔漢明帝欲封其子云我子豈得與先常子等可半楚淮陽前史以爲美談天子姊妹爲長公主天子之女爲公主旣加長字即

是有所尊崇或可情有淺深無容禮有踰越上然其言又曰太平公主高宗少女以則天所生特承恩寵初永隆年降駙馬薛紹垂拱中被誣告與諸王連謀誅死則天乃殺武攸暨之妻以配主焉公主豐碩方額廣頤多權略則天以爲類己每預謀議神龍年誅張易之有謀進號鎮國太平公主賞賜不可勝紀二年置公主府時中宗韋后上官昭容用事皆以爲智謀不及公主甚憚之公主日益豪橫唐隆元年玄宗清內難公主又預其謀令男崇簡從之與玄宗尊立睿宗公主頗著大勳益尊重加實封五千戶通前一萬戶每入奏事坐語移日所言皆聽軍國大政事必參決如不朝謁卽宰臣就第議其可否公主由是驕恣田園遍於近甸貨殖流於江淮公主懼玄宗英武乃連結將相專謀異計時宰相七人五出公主門先天二年玄宗

漸危逼乃勒兵誅其黨蕭至忠等公主遁入山寺數日方
出賜死于家籍其家財貨山積珍奇寶物侔於御府
又曰唐隆元年勅公主置府近有勅摠停太平公主有崇
保社稷功其鎮國太平公主府卽宜依舊酸棗縣表楚客
奏記於中書令魏元忠曰女有內男有外男女有別剛柔
分矣中外斯隔陰陽著矣豈可相濫哉然而幕府者丈夫
之職非婦人之事令諸公主並開府建僚崇置官秩若以
女勳男職所謂長陰而抑陽也而望陰陽不僭風雨不爽
其可得乎竊謂非致遠之計乖久安之策書曰事不師古
以克永世匪說攸聞此之謂也君侯不正誰正之哉
又曰安樂公主韋后所生初中宗遷於房州欲及州境生
於路次性惠敏容質秀絕中宗韋后愛寵日深姿其所欲
奏請無不允許恃寵驕縱權傾天下自王侯宰相以下除

拜多出其門所營第宅并造安樂佛寺擬於官掖城西造
定昆池於莊延袤數里出降之時以皇后仗發於宮中中
宗與韋后御安福門觀之及韋庶人敗與駙馬武延秀皆
斬之追貶爲悖逆庶人
又曰武延秀武承嗣之二子也時武崇訓爲安樂公主婿
卽延秀之從父兄也數引至主第延秀久陷蕃中解突厥
語常於主第唱突厥歌作胡旋舞有姿媚主甚喜及崇訓
死延秀得幸尚主拜席日授太常卿兼右衛將軍駙馬都
尉
又曰大中二年以起居郎駙馬都尉鄭顥尙萬壽公主詔
曰女人之德雅合慎修嚴奉舅姑夙夜勤事此婦之節也
先王制禮貴賤同道旣已下嫁臣寮儀則須依古典萬壽
公主婦禮宜依士庶

又曰弘化公主宗室女貞觀十三年降吐谷渾慕容諾曷鉢

又曰文成公主宗室女貞觀十五年封降於吐蕃贊普弄贊命禮部尚書江夏王道宗送之弄贊親迎于河源見道宗執子婿禮甚謹歎大國服飾禮儀之美俯仰有媿沮之色謂所親曰我祖父未有通婚大國者今我得尙大唐公主當築一城以誇示後世仍遣酋豪子弟請入國學以習詩書從之

又曰貞元三年遣迴紇使合闕將軍歸其國初合闕將其君命請婚於我上許以咸安公主嫁之命公主見合闕於麟德殿且命齋公主畫圖就示可汗以馬價絹五萬疋還之許其互市而去以殿中監滕王湛然爲送咸安公主使仍兼婚禮使四年迴紇公主兼使者至自本蕃上御延喜

門禁婦人及車輿觀者時迴紇可汗喜於和親其禮甚恭乃上言曰昔爲兄弟今即子婿子婿半子也彼猶父此猶子父若患於西戎子當遣兵除之

又曰太和公主長慶元年封爲公主冊爲迴紇可敦出降愛登里邏骨沒密施合毗伽保義可汗初保義可汗旣立遣使求婚遂封第九妹爲永安公主將以降嫁其年保義可汗卒冊九妹迴體爲崇德可汗五月遣使請迎所許嫁公主朝廷封第五妹爲太和公主以降今迴紇焉雖狄人固請永安而終不許故命中書舍人王起就鴻臚寺以宣喻焉

列仙傳曰朱仲會稽市販珠人高后募三寸珠乃詣闕上之珠好過度賜五百金魯元公主私以七白金從仲求珠獻四寸之珠

又曰蕭史善吹蕭教秦穆公主作鳳聲公為作鳳臺令夫妻止其上一旦皆隨鳳飛去
 荀氏家傳曰荀羨字令則十五年擬國婚之選君不欲連姻帝室乃遠遁長沙監司追尋不獲已遂尚尋陽公主
 世說曰相武平蜀以李勢女為妾有寵嘗著齋後温尚南康長公主主始不知之既聞乃伺温不在率數十婢拔白刃往李所故欲斫之見李梳頭髮垂委地姿貌端麗乃徐下地結髮歛手向主曰國破家亡以至今日若能見殺實猶生之年神色閑正辭氣悽婉主於是擲刀前抱之阿姊我見汝不能不憐何況老奴遂善遇之
 風俗通曰列侯尚公主國人尚公主以妻制夫陽屈於陰爾
 漢武帝集柏梁詩曰左九嬪作萬年公主誅曰赫赫京室

河洛所經陰精發曜降茲淑靈篤生公主誕奮休禎秀出紫微日暉月明紅顏鬢髮金質玉形

駙馬

漢書曰駙馬都尉掌駙馬

駙馬非正駕車皆為副馬一日駙近也疾也

又百官公卿表曰漢武元鼎二年置三都尉駙馬奉車掌御乘輿車騎都尉掌羽林從騎並無員或以侍中常侍卿尹校尉左遷為之

漢舊儀曰駙馬都尉掌騎從武帝置秩比二千石

蜀志曰諸葛瞻字思遠建興十二年亮出武功與兄瑾書曰瞻已今年八歲聰惠可愛嫌其早成恐不為重器耳十七尚公主拜駙馬都尉
 宋書曰江敷字叔文母宋文帝女淮陽公主幼以戚屬召見孝武謂謝莊曰此小兒方當為名器少有美譽尚孝武

女臨海公主拜駙馬都尉爲丹陽丞時表粲爲尹見數歎曰風流不墜正在江郎數與宴賞留連日夜齊書曰王暕字思晦年數歲而風神警拔有成人之度時祖儉作宰相賓客盈門見暕曰公才公望復在此矣弱冠選尚淮南長公主拜駙馬都尉陳書曰表樞博學明悉舊典初陳武帝長女永嗣公主先適陳留太守錢戴生子岳並卒于梁時武帝受命唯公主追封主客請議加戴駙馬都尉并贈岳官樞議曰昔王姬下嫁必適諸侯同姓爲主聞於公羊之說車服不繫顯於詩人之篇漢氏初興列侯尚主自斯已後降嬪素族駙馬都尉置由漢武或以假諸功臣或以加於戚屬是以魏曹植表駙馬奉車趣爲一號齊職儀曰凡尚公主必拜駙馬都尉魏晉已來因爲瞻准蓋以王姬之重庶姓之輕若不

加其等級寧可合昏而醕所以假駙馬之位乃配於皇女也今公主薨伉儷已絕旣無禮數疑何須駙馬之授案杜預尚晉宣帝第二女晉武踐祚而已亡秦始中追贈公主元凱無復駙馬之號梁文帝女新安穆公主早薨天監初王氏無追拜之事遠近二例足以校明無勞此授宜追贈亭侯時以樞議爲當

後魏書曰陸昕之風望端雅尚獻文女常山公主拜駙馬都尉

又曰馮誕字子正與高祖同歲幼侍書學特蒙親待尚高祖妹樂安公主拜駙馬都尉高祖寵誕同輿而載同按而食同席而坐

又曰宿石高宗時爲中散嘗從獵高祖親欲射虎石叩馬而諫引高宗馬至原上後虎騰躍殺人詔曰石爲忠臣而

控馬切諫免虎之害後有犯罪宥而勿治尚上谷公主拜駙馬都尉
 又曰萬安國代人父振尚高陽長公主拜駙馬都尉遷散騎常侍馮翊公安國少明敏有姿貌以國甥復尚河南公主拜駙馬都尉遷散騎常侍顯祖特親寵之與同卧起為立第宅賞賜至鉅萬超拜大司馬大將軍封安成王
 唐書曰文宗儉素嘗駙馬都尉韋處仁入見帶佩夾羅巾進上謂曰本慕卿門戶清素故俯從選尚如此巾服從他諸戚為之卿不須為也
 又官品志曰駙馬奉車騎三都尉並無員駙馬以加尚公主者無班秩。語林曰何晏字平叔以主壻拜駙馬都尉美姿儀帝每疑其傅粉後夏月賜以湯餅大汗出以朱衣自拭之尤皎然
 太平御覽卷第一百五十四

皇親部舉謔

皇后

提目帝相后注少康二妃附五字脫 摠序后妃 婚義
 教順順訓通 漢舊儀又日月辰辰作娠 後漢書甄瑗瑤字脫 遂忘淄蠹忘作志 安事安疑委訛 後魏書椒房等以下七字脫 緣保母緣字脫照前文補 庖犧母 河圖注人定之時時字脫 神農母 孝經鉤命決任姒任作佳下帝王世紀同 有蟠氏蟠作嬌下同 一曰少典四字脫 生常臨女子清本作生帝魁 帝譽四妃 河圖生於赤帝伊堯清本作生帝堯於伊祁 春秋合誠圖即慶都之謹清本無之謹以下八字 史記又曰牛馬八字脫 尸子之娥之當作以 夏禹母 河圖著命生帝文命我禹興清本作生帝戎文禹一名文命按我

疑妣訛 禹妃 帝王世紀生啓啓作余 帝乙妃 史記辛爲嗣辛爲二字脫據本書補 周大王妃 列女傳女曰賢曰字衍 秦始皇太后 說苑俱博清本俱作棋 皇親部二提目孝成趙皇后成下衍帝字 高祖薄皇后 漢書漢王四年按當作四年漢王 孝武陳皇后 梟首於市四字脫 孝武李皇后 衛思后廢衛思后三字脫 鈞弋趙皇后 列仙傳推而得之得之二字脫 孝宣許皇后 漢書謀介清本謀作媒 宣帝云云別項非也當刪漢書以下六字與前文接爲一節 心議議字不通本書作儀晉灼曰儀向也今據改 孝宣霍皇后 爲女成君君作裾 孝元王皇后 丙殿丙作內據本書改 孝元傅皇后太子得進幸五字脫 信都馮太后 建昭中上以下闕別起漢書曰云云按是一段文不可割

爲兩項今刪漢書曰元帝建始中八字以接上文昭作始 左右格殺格當作格 孝成許皇后 至卽帝位本書無位字帝疑后字 孝哀丁太后 山齊山下疑脫陵字 以爲世戒世作時據本書改 孝平母衛姬 日夜上當復有衛氏字 孝平王皇后 豫節本書豫作豫 皇親部三提目敬隱敬作孝 光武郭皇后 續漢書陽安思侯作陽恩侯清本陽安倒今據本書補正 孝明馬皇后 東觀漢記後出諸髮清本後作復 孝和鄧皇后 續漢書七年中復與諸家女本書文承上故有復字此文既略復字亦當刪 有異異字疑衍 和帝未崩按未崩當作末年 掖庭考問庭字脫清本無考字 孝安閻皇后 謚安思后按例后上當有皇字 孝桓鄧皇后 上誅后兄冀等按冀非后兄此文有誤 孝桓竇皇后 廢

其宦宦當作官 漢興以來興作元 孝靈何皇后 楚
楚與士人共事乎清本無楚楚二字 孝靈王皇后 王
障清本障作章 遂不敢播清本播作潘 文陵清本文
作立 孝獻伏皇后 曹瞞別傳發壁發作廢以意改
皇親部四提目謝夫人附大書據摠目改 元帝夏侯太
妃以下東晉例當別提 魏志皆欲歸欲字脫 拜為王
皇后皇字衍 文甄皇后 得五璽得字脫 營宗廟宗
字疑有誤 舅氏親踈清本踈作屬 魏書乃獲斯祚乃
字脫祚作可 明帝毛皇后 魏志父嘉父上當有后字
左右日曰字脫照本書補 武元楊皇后 晉書採諸
葛冲等女五十人女字脫今補 武悼楊皇后 稽顙稱
妾妾字脫據本書補 惠賈皇后 召人作答詔草作字
脫據本書補 為產具具字脫據本書補 晉書又曰作

沉約宋書曰 晉後略廉車廉疑簾 惠羊皇后 臧氏
晉書弘猷清本猷作獻 簡文鄭皇后 晉中興書夫又
亡又字衍不然句上有脫文 皇親部五提目後魏敘后
事舊後魏一行敘后事一行神元寶皇后上有魏字今皆
據摠目改正 相祁皇后祁作維下同 昭成慕容皇后
後魏書慕容元真元作天 獻明賀皇后 南齊輅字
充渥元作元 道武慕容皇后 令后鑄令字脫據本書
闕 補 明元杜皇后 高閔清本本書閔皆作閭 文
成馮皇后正覺覺字脫 六親六作本 有雌雉清本本
書雌作雄 千年堂本書千作萬 孝文馮皇后 空坐
有心坐作生 孝文高皇后 文昭貴人文昭字脫 祔
廟定號祔字脫據本書補 靈輓遷還本書遷還作既遷
宣武高皇后 在洛二十餘年二上行二世字 皇子

全育子上衍太字 宣武胡皇后 勸為諸計清本諸作
 儲 孝明胡皇后 頗有酒德有作在清本作任據本書
 改 后及嬪御后字脫據本書補 文帝乙弗后 武都
 王戎清本戎作戊 引被入入字衍 郁久閭后 馬萬
 匹駝千頭清本馬作騾駝作驢 東魏孝靜高皇后 後
 魏書侍中司徒徒作空 武阿史那后 後周書突厥滅
 茹茹滅字脫茹茹作蠕蠕據注而恕切當作茹茹本書亦
 作茹茹今據改 宣楊后 號弘聖皇太后清本作居弘
 聖宮皇太后本書作居弘聖宮無皇太后三字 靜司馬
 皇后司州刺史刺字脫據本書補 煬帝蘭皇后 隋書
 梁明帝歸注丘軌切清本軌作韋 未嘗不隨侍侍從衍
 一 皇親部七提目上官昭容與諸后平列按本傳昭容
 載韋后傳後故此目亦別項出之然於例為非宜如上徐

妃附書也 唐高宗寶皇后分目無唐字今照前例補
 唐書平陵作始平 救舅氏之難救作扶 中宗廢韋皇
 后 及武延及上當有后字 玄宗武皇后 恒安王攸
 正新唐書正作止 懷安哀王安字脫 楊皇后 中左
 右中上疑脫宮字 宋尚宮 駙馬沉議清本議作請
 昭宗何皇后 薄苻苻作符今改 蜀穆后 蜀志使相
 后云當大善貴焉使善二字衍 吳潘后 吳志六七十
 人清本無十字 孫皓滕后 皓內內上當有宮字 前
 趙劉淵母呼延妃 崔鴻三十國春秋清本三十作十六
 卷內所引皆同 劉聰呼延妃 前趙錄淵后之從父清
 本后作母 大劉后 忿之不已已作怒 小劉后 殷
 二女七字闕 後趙石勒劉后 後趙錄色令清本作美
 色 陳妃 沉約宋書本書太妃家上有世祖嘗使尉司

探訪民間女子有姿色者十六字按此文雖節抄欠此數語文義不通 以乞李道見清本乞下有將軍二字 蕭昭業母王后 齊書陳設設作故 宣德宮宮作后 蕭衍郗后 梁書曰三字脫今補下阮脩容條同 此女光高將有所妨高將作適字今據本書改補 丁貴嬪 嬪時年十四嬪上脫貴字以意補 蕭繹徐妃 透井清本透作投 陳頊柳后 陳書安成王成作城據本書改 張貴妃 遊宴宴上衍之字 爾朱太妃 北齊書爾朱迎朱下當有妃字

女官

昭儀 漢書昭儀之之字衍 插藍田璧清本插作函本書同 後魏書又曰過初初作本 夫人 禮記婚義明章婦順婦字脫 五經要義月辰辰作娠今改下女史靜

女注同 故着左手左手二字脫 漢書又曰與趙二字脫 薄姬初時約五字脫 又難再得難再作不可 魏志有容華有夫人夫當作美 定為嗣定作之 列仙傳神祠疑有誤 西京雜記出塞塞作塵 貴人 東觀漢記生孝崇皇作為穆皇后 又曰孫壽之舅舅作男 婕妤 漢書又有親二字脫 館陶公生母華婕妤公華字脫 皇后廢皇下衍之字 晉服制令采璵玉采作朱照晉書改 婦人集記言清本記作託 嬪 周禮注九九而御九九脫今補 晉書顧聞聞當作問 晉起居注趙班清本班作誕 朱華華作姜 又曰明識以下闕 左貴嬪集泣嘔頌賦嘔作漚 世婦 周禮內差差訛注同 周禮春官注后宮官也王后六官后作居官也二字脫下后作者皆據本書改 禮記月令又曰注是時時疑

當特訛 月令章句簡娥清本娥作狄 祈於高禖祈字
 脫 又日考功二字脫 美人 漢書又高祖過高祖字
 脫據本書補 王隱晉書列給清本給作紀按給疑級訛
 女史 毛詩注古者之古以金之以並脫 彤管也赤
 貌本書作彤管赤管也 周禮職掌職字脫 鉤考鉤字
 脫 書內治之藏以令之藏以下衍

太子

周易鼎卦注巽為股巽作乾股作服下同 以為世子之
 之字衍 震卦注掌其之祀之字衍 尚書大傳出侯以
 燎本書侯作浹清本作侯 尚書中候又故號號下疑脫
 王字 周書吾語女所保所守之哉之上疑有脫文本書
 文與此異 賈誼書公不與六字脫 尚書大傳注在舜
 舜作受以意改 故堯推尊舜五字脫 家語乃雍據注

雍自是別字不然注為無謂 韓詩外傳又日何不遣人
 使大國大國有誤本書作何不遣使乎上有數句 周禮
 又存遊倅存作在 左傳晉侯注故傳日按日疑具訛
 又秦康公注其言聲言氣言氣恐衍 日畏他日上當有
 一字 又日注二十五五下當有年字 又齊侯注諸子
 妾姓子者姓作生氏作者戎子嬖戎字脫皆據本書改補
 列於諸侯矣注也伐盟會清本也作北 疾病注病困
 也病作疾以意改之也下有脫字 左傳又楚平王注秦
 嬴也秦上當有母字 又齊燕姬注高昭昭下當有子字
 穀梁傳又日注招廢於十年矣清本作招殺在元年本
 書無招殺二字 家語問禮禮字脫注阼主人之位阼字
 脫則醮醮字脫皆據本書補 又日注如子之冠子疑士
 訛本書注作怪天子無冠禮如諸侯之冠世子之冠故問

之 孔叢子公曰文王公字脫據本書補 尊其尊其尊
脫 白虎通曰作又曰 齊君子之亂下衍君在者三字
本書齊作壓 燕丹子丹聞丈夫之道節義廉耻道作通
節義倒廉字脫 漢書又曰不敢絕馳道馳字脫 樂燕
注沉讌字脫 又曰元帝庶孫元帝二字脫 續漢書雜
止清本止作坐 後漢書王男男作聖舅據本書改 魏
志謂曰思三字脫 王隱晉書又和嶠往觀之最六字脫
又曰華虞注音翼清本翼作異據字典兩音皆通 往
來止止上疑脫居字 賈謐等等下當有謀字 隋書娶
婦則便婦字脫則便倒 唐書薛鏞鏞作鏞 又見子西
原清本無見子一字蓋衍文 太孫 後魏書又抱高祖
馬上馬上恐倒不則祖下脫於字 太子妃 王隱晉書
倩外人倩作請 晉起居注大興五年五當作元 望蔡

公蔡字闕 天寶賜天當夫訛 東宮舊事東宮屬屬上
疑脫官字 齊書又曰釵鈔本書鈔作鏞 唐書又曰使
於使疑便

諸王

史記又曰張卿酒酣卿下行一卿字 漢書又曰梁懷王
緝本書緝作揖 又注葭蘆葉蘆葉二字脫 又注地狹
不足回旋狹回字闕 又謂太子霸曰謂作讓據本書改
又親隱隱字脫 又於是施是下有脫文 范曄後漢
書又曰抗袖抗作枕 漢名臣奏王其兔之免恐勉訛
魏略瘠薄瘠作瘠據三國志注改清本作瘠 魏志十三
疾病疾病作病卒 吳志崇待待作特 晉書又曰太后
留攸攸下有脫文 將復如何復作須 又謂成都王曰
謂作與 晉中興書又曰武陵威王晞爲相温所收按以

下文有錯脫當作遵忠敬王少子也晞被廢卒後追封新安王遵初封新寧王云云但初封之初刪去爲是蓋晞後復武陵本封而遵嗣焉此文節抄不曰襲封武陵則初字爲冗 宋書又曰此米米字脫 齊書字雲英少有清尚字及有尚字脫據本書補 後魏書又曰以武著稱今魏任城八字脫 又東平王匡本書東作廣 又豈足大用足作是 有不見者本書無不字 賈誼書以爲不可是故本書是作剽清本作制

史記王妃

晉中興書帝廢追貶四字脫 又名家人晉書無人家字 公主

春秋左傳襄二十五年作四年 史記又曰恐試近本書恐字無近作延 必受受作愛今改 魏武侯下魏字衍

後漢書又曰兵敗敗下有脫文 晉讚權由此權當權

訛 宋書又曰常與常作帝據本書改 寢食二字脫據

本書補 彭城王義康本書康作宜 劉湛等頗相附及

劉湛得罪湛下並有之字誤也今刪 旣見旣作及據本

書改 一頓一字脫據本書補 又閭閻作閭據本書

改 殆自同殆作迨同作害皆據本書改 當待當疑應

訛 清官美宦清作青宦作官皆據本書改 披露披作

被誤也今改 規全身規字衍 後魏書又蠕蠕國國作

日 又求婚婚字脫 隋書又曰建德誅化及五字脫

唐書又曰男爲外戚男作再 又承嗣之二子也二作弟

又諸曷鉢作諸易鉢據新唐書改 又見道宗執子壻

禮道宗作主據新唐書改 又滕王滕作嗣據新唐書改

今九妹妹作姓 柏梁詩誕奮奮字闕

駙馬

齊書復在復作須 陳書作梁書 王公主追封四字脫據
本書補 亭侯亭作陳據本書改 唐書帶佩夾羅巾帶
字脫佩作巾據本書補正

齊書復在復作須 陳書作梁書 王公主追封四字脫據
本書補 亭侯亭作陳據本書改 唐書帶佩夾羅巾帶
字脫佩作巾據本書補正
又承佩之二字出二
又承佩之二字出二
又承佩之二字出二
又承佩之二字出二
又承佩之二字出二
又承佩之二字出二
又承佩之二字出二
又承佩之二字出二
又承佩之二字出二
又承佩之二字出二

皇親部覆校舉謄

摠序后妃 後漢書潛縱僭誤潛 帝馨四妃 春秋合
誠圖貞圖負誤貞 提目孝昭趙太皇后誤皇 孝宣霍
皇后 漢書故當常誤當 西魏郁久閭后 後魏書齒
簿鹵誤齒 武阿史那后 後周書太祖祖誤祖 徐妃
唐書丞動丞誤丞 劉駿母路后 沉約宋書賤物錢
誤賤 高祥李后 北齊書太厚原誤厚 美人 江表
傳捧殺棒誤捧 女史 彤管有煒以下誤為別項 太
子 毛詩又城壤壤誤壤注同 孔叢子子恩思誤恩
王隱晉書又伏其事辜誤事 唐書又元吉問行間誤問
行第第誤弟 又孝散敬誤散 太孫 王隱晉書皇
孫藏臧誤藏 乘復桑誤乘 良娣 唐書蕭宗肅誤蕭
保林 王隱晉書所幸辜幸誤辜 諸王 魏志聰蔡察

